

那文毅公奏議

那文毅公三任陝甘總督奏議卷五十七目錄

卷五十七

平番全策

那文毅公三任陝甘總督奏議卷五十七

上海圖書館藏  
駐國書院藏

平番全策

道光二年十二月十三日會同西寧辦事大臣松  
公廷

奏爲玉樹番族每歲馬貢折銀請循舊例交納以免  
苦累番民事竊查青海大臣衙門所管玉樹番子  
自雍正十一年安插後除覺巴拉喇布二族承當  
遞送公文濟渡等差不納貢賦外其餘三十九族  
計八千三百六十九戶每年每百戶納馬一匹折

銀八兩共徵銀六百六十九兩五錢二分嗣因地震雪壓減免銀五十一兩二錢實徵銀六百一十八兩三錢二分遣人往催恐有勒索情弊原議令該番自自赴西寧交納由西寧辦事衙門會同西寧鎮委員眼同西寧道兌收貯庫至乾隆三十一年前任青海大臣海明因番子拖欠馬折銀兩每歲差派通丁前往催收至會盟之年本有青海大臣衙門主事前往會盟卽就便徵收臣等訪聞通丁出口往返數千里所需帳房烏拉俱係蒙古應付該通丁等恃有烏拉任意攜帶貨物並私帶買

賣客商幾如堪布之商上人沿途蒙古受累已屬不小至玉樹番族地方列肆售賣又故昂其值一日售賣未竣該通丁等一日不歸飯食供應俱係番族預備計其往返之期總在半年以外卽會盟之主事前往獎亦相等而該主事則又私備布疋等物致送番族名爲土儀因得受番族餽送薄往厚來是正供不過六百餘兩而蒙番所費實十倍正供不止查貢馬折銀爲數無多推原定制以示勸懲勿絕之義若因此擾累番族並擾及沿途之蒙古實非所以仰體

皇上綏柔遠人之道且現在蒙古日益貧窮玉樹番族亦屬被四川果洛克搶劫若不及早革除蠹弊尤恐滋生事端臣等查玉樹番族每年前來西寧販賣皮張一次得價不下六七萬金所有此項貢馬折銀應請仍循舊例責令該總管千百戶等如數奏齊於每年九月間交該處貿易番目自赴西寧交納仍令青海大臣會同西寧鎮派員眼同西寧道兌收貯庫該番族本有數萬金買賣斷不致有拖欠其主事通丁催徵之處永行停止仍請嗣後於該主事前往會盟之年嚴加查核不得自備土

儀私餽番族並嚴禁私帶貨物及買賣人等倘有  
故違卽奏叅治罪以除積弊而示懷柔謹

奏

道光二年十二月二十八日奉

上諭那彥成等奏玉樹番族每歲馬貢折銀請循舊例  
交納一摺青海大臣衙門所管玉樹番族向有馬貢  
折銀由該番目自赴西寧交納嗣於乾隆三十一年  
改派主事通丁前往催收各番族供應較繁殊滋擾  
累那彥成等請循照舊例辦理用示體卹著照所請  
嗣後此項貢馬折銀著仍循舊例責令該總管千百

戶等照數湊齊於每歲九月間交該處貿易番目自  
赴西寧交納仍著青海大臣會同西寧鎮派員兌收  
貯庫所有主事通丁催收之例永行停止至該主事  
前往會盟之年如有自備土儀致送番族及客商私  
帶貨物一併查明究辦以除積弊

道光二年十二月十三日會同西寧辦事大臣松  
公廷

奏爲審明裝番肆行搶劫之重犯卽行正法恭摺具  
奏事竊臣前將懲辦私販私歇各漢奸並拏獲首  
盜麻木溝究出夥黨續經拏獲虎三等俱經審究



明確因尙有未獲黨羽均須質審請將麻木溝等  
暫緩正法

奏明在案嗣據各該處文武員弁先後拏獲各案犯  
解至西寧臣等督率委員道府分別研訊除與野  
番結拜勾通煽惑之漢奸蘇誠奏明正法外現訊  
私賣軍器及無票出口私通野番罪應軍流徒者  
共七十餘犯已陸續咨部核辦其情罪較輕擬以  
枷杖遞籍管束者共五十餘犯亦經照例批結惟  
麻木溝等供出隨同搶劫肅州馬廠之趙六拜阿  
渾拜老三馬木頭黃阿渾馬八李鬍子唐五馬二

等九犯又另案搶劫之岳昇岳七馬花齊三犯自知罪犯必死輾轉狡賴旋認旋翻臣等督率該道府晝夜隔別熬訊始據該犯等供認搶劫實情臣等隨提犯復加研訊緣麻木溝與拜阿渾拜老三馬木頭俱係河州回民唐五係河州漢民黃阿渾趙六俱係肅州回民李鬍子馬二俱係張掖縣漢民馬八係中衛縣回民張保娃係大通縣回民虎三係西安府高陵縣回民岳昇岳七係西安府咸陽縣漢民米八係咸陽縣回民馬花齊係長安縣回民麻木溝於嘉慶十八年間因屢次偷盜牲畜

經大通縣訪拏羈禁至二十二年始行釋放後卽  
至野馬川野牛溝一帶遊蕩並與另案已獲之蔣  
家娃雞姦二十三年七月內麻木溝起意與蔣家  
娃及未獲之羅什仔偷竊熟番馬四匹二十四年  
間不計月日麻木溝起意與未獲之楊格弄殷添  
才搶劫不認識蒙古馬二十四匹賣錢俵分二十  
五年間不記月日有角昂族野番一百餘人來至  
野馬川麻木溝引領搶劫黃番牛羊一千餘隻分  
得羊十餘隻道光元年正月內麻木溝與蔣家娃  
並未獲之同民馬胡賽呢馬伏瀝分執繩鞭器械

乘夜偷竊西寧縣屬平戎驛布舖內布疋並甘州府南關當店內衣物分攜逃逸麻木溝仍至野馬川遊蕩至十二月內引領角昂族野番一百餘人在大馬營灘地方搶劫不認識蒙古馬牛羊五百餘匹隻分得牛羊二十隻馬一匹本年春間有與麻木溝素識已獲之虎三米八張保娃暨未獲之趙牙信韓百林並已獲尙未解到之海金斗等先後來至野馬川同住六月內麻木溝與虎三米八張保娃海金斗俱穿戴番衣番帽引領角昂族野番十數人至三個俄博地方搶劫不認識蒙古牛

羊二百餘隻分得羊九十隻此外搶劫之案經年累月不一而足惟於今年七月初間有角昂族野番頭目羣增並察漢諾們罕番族沙哈加藏根帶領四五十人來至東鎖地方與麻木溝趙牙信韓百林會遇麻木溝等教令該番族往肅州馬廠搶劫馬匹並稱野牛溝金廠之人可以領路隨先至金廠向廠內頭人趙五趙六拜阿渾等告知角昂族野番等隨後踵至廠內僱工人等畏懼跑避其頭人內已獲之趙六拜阿渾馬木頭拜老三唐五黃阿渾李鬍子馬八馬二暨已獲尙未解到之田

全並未獲之趙五李二班姜有才田老二馬四唐  
三馬林馬宗甸等約共二十餘人與麻木溝等俱  
著野番衣帽分執刀棍帶領角昂族野番人等同  
至肅州馬厰適值兵丁數人趕馬在陶賴川飲水  
隨一同上前搶劫官馬五百餘匹跑逸因官兵追  
趕將馬沿途丟棄止剩得八九十匹麻木溝等分  
得馬一二匹不等隔別訊問所供俱相脗合又是  
月內不計日期麻木溝與虎三趙牙信韓百林帶  
領角昂族並察漢諾們罕堪布喇嘛哩喇嘛等百  
十餘人至六道溝地方遇見不知姓名腳戶趕有

米麵貨物一百餘駄野番人等放鎗致斃脚戶一  
人又刀傷一人其餘脚戶驚跑隨一同上前將貨  
駄全行趕走至大泉地方又遇米八張保娃同至  
羊胸子地方搶劫牛羊三百餘隻麻木溝又同趙  
牙信韓百林三人引領該番族至察漢俄博地方  
搶劫得馬牛羊共一千餘匹隻俱各俵分又另案  
被獲之岳昇與弟岳七平素偷竊牲畜不計次數  
二十五年七月內岳七起意商同未獲之索泳保  
索泳富暨沙克都爾王旗下章京岳莫齊布藏根  
並不知姓名蒙古一共六名搶劫得蒙古巴顏家

羊一百四十隻俵分又是月不計日期岳昇起意同弟岳七搶劫得蒙古乙墨庫家牛六隻賣錢使用本年六月二十一日岳昇起意商同岳七並米八張保娃馬花齊暨賡第貝子旗下蒙古引加台吉塔爾齊布木倫沙克都爾王旗下章京岳莫齊布藏根蒙古墨楞及不認識蒙古五人一共十四人出外搶劫俱著番衣幅分攜刀械同至羊胸子地方見有牧放一羣羊隻蒙古引加台吉等放鎗將趕羊人驚跑隨一同上前搶劫得羊一百餘隻俵分茲經先後拏獲解案逐一隔別嚴行審究俱



各供認前情不諱研訊委無搶劫別案應卽按例  
定擬查例載響馬強盜執有軍器白日邀劫道路  
贓証明白者俱不分人數多寡曾否傷人依律處  
決梟示又盜犯明知官帑糾夥行竊但經得財將  
起意爲首及隨同上盜者擬斬立決梟示各等語  
此案麻木溝前後共搶劫八次虎三米八張保娃  
岳七俱各搶劫三次岳昇搶劫一次趙六拜阿渾  
拜老三馬木頭黃阿渾馬八李鬍子唐五馬二馬  
花齊俱搶劫一次該犯等於搶劫時俱係假裝野  
番騎馬持械並膽敢至肅州馬廠搶劫官馬不法

已極均屬罪不容誅除馬二岳七二犯尙有續拏  
之夥黨均應待質請暫緩正法外麻木溝虎三米  
八張保娃趙六拜阿渾拜老三馬木頭黃阿渾馬  
八李鬍子唐五岳昇馬花齊等十四犯均應卽照  
響馬強盜執有軍器白日邀劫道路賊証明白者  
俱不分人數多寡曾否傷人依律處決梟示例俱  
斬決梟示該犯等罪大惡極未便稽誅臣等於審  
明後將該犯等卽行正法傳首各犯事地方以昭  
炯戒各案逸犯趙牙信韓百林趙五等仍開列年  
貌住址嚴飭各該屬嚴緝務獲毋致一名漏網其

與麻木溝一同被獲之黃魁添暨麻木溝雞姦之  
蔣家娃二犯訊明均止疊次行竊並未與麻木溝  
等夥同搶劫應分別擬軍照例咨部核辦再查目  
下野番陸續南渡河北將次肅清蒙古等雖係窮  
極無賴而近被漢奸教引偷竊搶劫之案各旗漸  
次增多不得不擇其尤甚者加之懲治二十四旗  
中惟郡王沙克都爾屬下爲多甚至其台吉藏根  
等均犯搶劫又貝勒尖巴里屬下搶竊亦多擬俟  
查明後將該王貝勒斥革另議承襲以示懲戒至  
各屬陸續拏獲漢奸盜犯業經解到尙未審定者

共四十餘人現在督飭道府趕緊審訊分別奏咨  
辦理此外仍有已經拏獲尙未解到人犯共七十  
餘名<sub>臣</sub>等亦經檄催解審未獲各案犯並嚴飭所  
屬文武務獲究辦謹

奏

道光二年十二月十八日奉

上諭那彥成等奏審明裝番肆劫之重犯卽行正法一  
摺此案麻木溝等假裝野番騎馬持械肆行搶劫不  
法已極那彥成等業將先後拏獲各犯審明按律辦  
理各案逸犯趙牙信韓百林趙五等著仍開列年貌

住址嚴飭各該屬嚴緝務獲毋致一名漏網其苦魁  
添蔣家娃二犯訊明均止疊次行竊並未與麻木灌  
等夥搶應分別擬軍著卽照例咨部核辦至所稱二  
十四旗中郡王沙克都爾屬下偷竊搶劫之案爲多  
甚至其台吉藏根等均犯搶劫又貝勒尖巴禮屬下  
搶劫亦多擬俟查明將該王貝勒斥革另議承襲以  
示懲戒等語蒙古等被漢奸勾引竊劫犯案滋多該  
郡王貝勒不能嚴加約束咎有應得如果查明實有  
叅賊窩贓確據則是該郡王等作奸犯科不遵法律  
自應從重懲治若其咎止於失察遽將該王貝勒斥

革另議承襲該督等雖爲整飭邊務起見但似此辦理未免過當不足以服蒙古之心著那彥成等詳細斟酌該王貝勒於所屬竊劫之案是否僅止失察務須查照定例奏明辦理不可稍有偏倚

道光二年十二月十三日會同西寧辦事大臣松公廷

奏爲擬改沿邊營制酌定會哨章程籌畫經費以重國帑而慎邊防事竊臣松廷前經會同陞任督臣長齡酌擬西寧沿邊各營汛移駐將弁等官三十四員馬步各兵二千名以資防剿當經繕摺開單奏

奉

諭旨交

臣

那彥成體察情形覆核具奏維時

臣

甫抵西

寧竊見野番佔踞河北沿邊一帶不得不遍設兵防以稽查私販之糧茶卽以捍禦野番之侵突並因各處卡兵擒獲漢奸番賊稍有成效當經繕摺覆奏均請照長齡等所奏辦理並聲明沿邊防堵原係權宜之計應俟野番回巢之後另議章程或再相地移營長齡所奏添建兵房營堡衙署應請暫緩興修仰荷

聖慈俞允茲野番各族經斷絕糧茶甚嚴枵腹不能自

立業已陸續渡河回巢河北卽日可望肅清臣等  
悉心體察野番之偷渡本貪水草其搶劫蒙古亦  
其世仇本於河北路徑情形無由知悉自有漢奸  
勾引煽惑始擾及沿邊一帶且現在拏獲漢奸蒙  
古審明搶案其冒裝番子搶劫者十之七八其勾  
結番子搶劫者不過十之二三野番等遠在一二  
千里之外漢奸蒙古假托其名而野番冥頑無知  
致居下流之惡今旣斷其內線旣無隨同搶劫之  
利又經斷絕糧茶固不敢侵犯邊陲亦斷不能立  
足河北實可不勞而定萬不值多糜帑項防此患



番臣等連日同提臣齊慎鎮臣穆蘭岱馬騰龍等

復將長齡奏移官兵數目逐一核其俸餉馬乾以  
及建築營堡衙署兵房各費通盤籌算其黑石頭  
雙俄博等六處地處邊界五穀不生須照大通之  
例辦理若如所奏安官兵九百餘員名除裁撥原  
額抵補外每年應增添科則銀九千餘兩卽屬永  
遠經費而移駐各營應建兵房衙署營堡約畧估  
計需銀不下八九十萬兩在長齡與松廷因彼時  
番情日肆祇顧防其滋擾卽臣亦因防兵已收成  
效遂奏請照辦均屬一時之計未能籌及費用伏

惟我

皇上慎重邊防原不惜帑金以收邊境又安之效然

臣

等受

恩深重具有天良相幾度勢實在可從撙節者斷不敢

因奏准在先遂稍涉回護致有定之帑虛糜於無

用茲會同提

臣

齊慎鎮

臣

穆蘭岱馬騰龍等將長

齡奏增營汛與沿邊要隘地形叅以蒙番現在情

事詳加酌核所有永安營屬之黑石頭雙俄博白

塔營屬之武勝溝黑林口及附近之哈瑪爾托亥

撥科等六處原奏增添官兵九百餘員名均請毋

庸增添惟永安營所屬之察漢俄博地方在甘州  
扁都口外西接野馬川野牛溝東連二道溝羊胸  
子爲漢奸往來必由之路迤南伊斯們沁之外即  
係蒙古牧界該處擬設都司一員把總外委四員  
兵丁三百名已足備控制稽查之用至該處雖係  
永安營所屬惟距永安較遠距永固較近所有移  
駐官兵均改歸永固營副將管轄又長齡原奏鎮  
海營移駐副將等官兵九百餘名哈喇庫圖爾移  
駐都司等官兵一百五十餘名查鎮海營駐紮丹  
噶爾商民雲集蒙古等進口貿易俱在該處自應

移駐副將大員以資彈壓惟原奏移兵九百餘名未免太多應請移兵二百餘名連原有兵額共六百名其哈喇庫圖爾爲近內第一要衝應請移駐守備一員兵丁九十餘名連原有兵額共二百四十名謹將臣等現議裁撥添設官兵數目另繕清單恭呈

御覽至河北各旗蒙古現在避入內地者居其大半野番回巢之後卽當諭令各歸原牧不能以官兵常爲捍衛第各旗蒙古孱弱不振聞有野番卽不啻驚魂破膽若非依賴官兵斷不敢出口住牧若久

留內地窮苦日甚勢必滋生事端且蒙古與百姓  
襍處亦屬不成事體河北曠土千里非有官兵扼  
要控制則野番無所顧忌雖河南循貴稽查嚴密  
究難保無乘間偷渡之人臣等再四籌商屯田一  
事費重需時且西寧邊外開凍遲而霜信早禾苗  
秀實恐難預期實未敢冒昧請行現擬於哈喇庫  
圖爾西南七十餘里察漢托洛亥地方添設營堡  
酌安將弁二十四員兵一千名惟是地連蒙古若  
招住新兵一時不能得力且築城及衙署兵房費  
用亦大招募之兵將來攜眷日久必有不肖之人

勾連蒙古又成漢奸其流弊亦不可不防臣等與提鎮熟商卽照新疆換防之例於甘肅寧夏河州涼州西寧肅州各標下遴選年力精壯技勇嫺熟之兵報明總督委員點驗前往防守期限一年更換不准告駐以杜日久交通蒙古之弊仍於兵丁一千名內酌撥二百名分安阿什罕水地方該處爲哈喇庫圖爾與察漢托洛亥適中之地聲勢可以聯絡所用築堡及衙署兵房之費亦較招住兵丁爲節省至察漢托洛亥之西北有瓊科灘方圓二千餘里青海各旗蒙古全往住牧儘有餘地前

有察漢托洛亥防兵西北又有察漢俄博之兵西  
有大山阻截東卽丹噶爾營汎野番若至瓊科必  
由察漢托洛亥經過若舍此不由卽須繞越大山  
出青海西南迴旋不下數千里遠涉行劫勢所不  
能該蒙古等依賴官兵庶可移住瓊科安居牧養  
俟數年之後休養生息可以自強自衛再行察看  
情形奏請裁撤又現在拏獲漢奸審明俱在野牛  
溝野馬川一帶居住其行劫之案又多在二道溝  
羊胸子一帶雖於察漢俄博設營防守究恐地方  
遼濶易於藏奸臣等前經奏明酌令提鎮副叅大

員分往會哨茲與提臣齊慎鎮臣穆蘭岱等會議

甘州提臣西寧涼州肅州鎮臣每年按季會哨一

次各帶弁兵五十餘員名共一年四次各標副叅

遊都每委會哨兩次各帶弁兵二十餘員名共一

年八次遇有偷挖金砂及在邊外窩洞潛匿或插

帳居住者立即查拏究辦如此則沿邊千餘里漢

奸無容足之地而蒙番均絕勾結之萌較之添安

營汛似屬費少功倍以上鎮海營哈喇庫圖爾所

添兵額均由各提鎮裁撥俸餉馬乾足以相抵惟

察漢俄博所移官兵三百餘員名該處係屬邊外



糧運維艱應照大通營科則給發除裁撥兵額抵補外尙不敷銀二千三百餘兩又察漢托洛亥換防官兵二十四員兵一千名除例給俸餉仍在原營請領外該官兵駐紮口外食物維艱防守亦較辛苦自應酌給口食每副叅日支銀三錢都守日支銀二錢千把外委日支銀一錢兵丁日支銀五分每年約需銀一萬八千七百餘兩又提鎮會哨四次副叅遊都會哨八次口食草料每年約需銀二千八百餘兩以上三項每年約共需銀二萬三千八百餘兩均屬費所必需而

國家經費有常臣等何敢妄議增兵糜餉再四籌款  
惟有於陝甘三提十鎮中以馬兵裁改守兵計四  
百五十名共撙節銀一萬三千五十餘兩以步兵  
裁改守兵一千名共撙節銀六千四百兩計各提  
鎮標下以馬改守者僅三十四五名以步改守者  
僅七十七名兵額不減而俸餉有餘又有大通協  
移駐鎮海營大通僅駐遊擊原額馬兵較多以馬  
兵裁改步兵一百六十三名共撙節銀四千五百  
八十餘兩三共撙節銀二萬四千兩零業已足敷  
所用如蒙

恩旨准行臣等再行閱具清冊分咨戶兵二部查核至  
新增及換防各處衙署兵房營堡約計不過數萬  
金前後較量節省幾及百萬再臣前在西寧辦事  
大臣任內會同長齡等奏請於冬令冰凍後派撥  
兵丁在適中之鄂倫布喇克地方防河每歲請銷  
銀六千餘兩嘉慶二十四年長齡秀莖等將防河  
改爲按季會哨奏定經費不得過五千兩茲臣等  
復加斟酌冬令河水結凍野番處處可以偷渡所  
有長齡等原奏經費銀五千兩應請仍留爲防河  
巡哨之用其如何辦理章程容俟詳細議明再行

具奏謹

奏

謹將酌擬移駐裁撥各營汛兵數目恭呈

御覽

一西寧鎮屬鎮海營原設遊擊一員千總一員把  
總二員經制外委五員額外外委二員兵三百  
五十七名今擬裁去遊擊移駐副將一員都司  
一員把總一員添兵二百四十三名並原設共  
兵六百名

一西寧鎮屬哈喇庫圖爾營原設千總一員經制

外委一員額外外委一員兵一百四十一名今擬裁去千總移駐守備一員添兵九十九名並原設共兵二百四十名

一西寧鎮屬大通營原設副將一員都司一員千總一員把總三員經制外委五員額外外委三員兵六百四十五名今擬裁去副將都司並把總一員移駐遊擊一員原設弁兵仍循其舊

一西寧鎮屬鎖海堡營原設守備一員經制外委一員額外外委一員兵一百九十九名今擬裁去守備額外外委酌減兵數移駐千總一員留

原設經制外委一員兵一百名

一永固協屬添設察漢俄博營都司一員把總一員經制外委二員額外外委二員兵三百名

一永固協屬馬營墩營原設都司一員經制外委

一員額外外委一員兵九十名全行裁撤

以上移撥副將一員遊擊一員都司二員守備

一員千總一員把總二員經制外委二員額外

外委二員兵六百四十二名均以馬四步六安

設

一裁減大通營副將一員都司一員把總一員

一裁減鎮海營遊擊一員

一裁減馬營墩營都司一員經制外委一員額外  
外委一員兵九十名

一裁減鎮海堡營守備一員額外外委一員兵九  
十九名

一裁減哈喇庫圖爾營千總一員

一裁減甘州提屬把總一員兵九十名

一裁減涼州鎮屬兵九十名

一裁減寧夏鎮屬兵九十一名

一裁減西寧鎮屬經制外委一員兵九十名

一裁減肅州鎮屬兵九十二名

以上裁減副將一員遊擊一員都司二員守備  
一員千總一員把總二員經制外委二員額外  
外委二員兵六百四十二名奉

硃批軍機大臣會同該部議奏

容安謹案此奏經兵部議准得

旨依議

道光二年十二月十三日會同西寧辦事大臣松  
公廷

奏爲拏獲蒙古搶劫各犯審明分別定擬事竊臣自



抵西寧訪聞各旗貧窮蒙古搶掠本旗或別旗蒙古並有勾引野番及假冒野番強劫之案隨密飭沿邊營縣認真緝隨據大通縣應曙霞丹噶爾主簿魏承恩先後稟獲勾引野番搶劫之察漢諾們罕旗下番子乙旦木等四犯假裝野番搶劫之蒙古牙藍丕勒等五犯又據札薩克台吉齊博克多爾濟呈報拏獲搶劫傷人之蒙古叩肯等二犯經臣等督飭道府逐案提犯研訊緣乙旦木密戕課塔卜善木均係察漢諾們罕旗下巴楞族番子尙班第係達賴喇嘛商上番子俱在鹽池居住道

光二年七月間野番剛咱族汪什代克族復由河南搬至鹽池與乙旦木等隣近居住是月二十間乙旦木至剛咱族向野番拉勒討要借去牛隻隨起意與剛咱族頭目策楞甲汪什代克族頭目凝克塔爾等相商出外搶劫隨分頭糾約現獲之尙班第塔卜善木乙密義課及在逃之尖巴里貝勒旗下蒙古和碩齊完布等十九犯並剛咱族汪什代克族不知姓名野番共一百餘人乙旦木等裝扮野番各騎馬持械惟塔卜善木徒手行至塔爾蓋地方見格勒克拉布濟公旗下蒙古昂貨年達

克等十五戶在彼牧放乙旦木等放鎗將事主驚散一同上前搶得馬三十餘匹牛羊一千三百餘隻分起逃逸俵分各散又另案拏獲牙藍丕勒恭布里代均係台吉旺舒克旗下蒙古泥瑪班第係貝子錫第旗下蒙古秋吉京巴兄弟二人係郡王車靈端多布旗下蒙古本年七月二十間牙藍丕勒至伊弟未獲之加化里柯本帳房談及窮苦起意行竊大通河山北蒙古加化里柯本允從牙藍丕勒復糾約現獲之恭布里代泥瑪班第秋吉京巴並未獲之克木却果一共七人各騎馬匹分持

鎗械惟泥瑪班第秋吉京巴三人徒手牙藍丕勒  
因知蒙古素懼野番卽令加化里柯本克木却果  
二人穿戴野番衣帽假冒行劫八月初三日夜走  
至山北一顆樹地方見有事主沙郭寺僧元旦囊  
貨牧放馬匹牙藍丕勒點放鳥鎗事主驚散牙藍  
丕勒等一齊上前搶得馬三十二匹逃至沙拉圖  
倭分各散又另案拏獲叩肯係貝勒札木巴勒多  
爾濟旗下蒙古丹增係郭巴番子本年七月十五  
日有未獲之郭巴番子朶布藏爲首糾約現獲之  
叩肯丹增並未獲之盤布端多布往黑溝地方偷

牛俱各允從一共四人均係徒手於是夜行至黑  
溝地方見事主蒙古恭藏同伊甥怕哈巴夫婦在  
草灘睡卧看守牛隻叩肯解牛恭藏知覺喊捕盤  
布端多布按住恭藏用石毆其額顱躺地朶布藏  
將怕哈巴按住叩肯卽用事主支帳房木桿毆打  
致傷怕哈巴脊背丹增亦按住怕哈巴之妻用拳  
毆打怕哈巴夫婦用力掙脫跑往隣近帳房喊救  
叩肯等恐有人至不及解牛卽搶掠恭藏等帳房  
內衣物而逸分別當賣俵分各散以上各案犯均  
經大通縣等先後拏獲正在審訊間丹增在監病

故委驗填格取結存卷事主恭藏等傷經平復復  
訊各案犯據各供認前情不諱詰無另犯竊劫別  
案自應卽行擬結除丹增一犯業經在監病故不  
議外查蒙古例載平人夥衆搶劫什物而未傷人  
將起意一人擬絞監候籍沒其產畜給付事主從  
賊並妻子產畜發河南山東交驛站充當苦差又  
例載偷竊蒙古牲畜三十匹以上不分首從擬絞  
監候又本年八月刑部等衙門會議嗣後蒙古偷  
竊牲畜三十匹以上之首從各犯亦俱仍照向例  
擬絞監候秋審時將首犯擬人情實從犯俱擬緩

決其夥衆搶劫未傷人之犯例什物內搶有牲畜  
在十匹以上者卽照例律二罪並發從其重者論  
照偷竊蒙古牲畜新例按其匹數分別首從擬以  
實綬奏准通行在案又例載平人夥衆強劫傷人  
得財者不分首從皆卽處斬籍沒其畜產給付事  
主各等語今番子乙旦木起意勾引蒙古並野番  
一百餘人之多施放鳥鎗搶馬三十餘匹牛羊一  
千餘隻蒙古牙藍丕勒起意糾衆行劫並令伊弟  
加化里柯木等假裝野番該犯亦施放鳥鎗搶馬  
三十餘匹查該二犯糾衆強劫牲畜俱在三十四

以上亦俱未傷人按照蒙古例及刑部奏定章程應將該二犯擬絞監候入於秋審情實惟近年西寧沿邊內外番案滋多率由蒙古漢奸勾引野番並假裝冒名肆行搶掠邊隅爲之不靖現在野番不日盡數渡河河北蒙古散在各處其窮苦無賴者在各州縣討乞間有力量稍充搆脅混在內地居處者日久亦恐生事且亦不成事體必須嚴查俾令各歸原牧而近日蒙古爲漢奸教引漸敢行強搶劫爲害幾與漢奸相等臣等再四酌量現在蒙古爲首各犯若仍照常例擬罪實不足以示懲



創乙旦木牙藍丕勒二犯應計

旨改爲斬立決仍傳首察漢諾們罕並蒙古各旗以昭  
炯戒蒙古叩肯聽從在逃之朶布藏偷竊牛隻臨  
時強劫衣物用木桿毆傷事主自應按例問擬叩  
肯合依平人夥衆強劫傷人者不分首從皆斬例  
擬斬立決仍與乙旦木等二犯一併照例籍沒其  
畜產給付事主番子乙密我課塔卜善木尙班第  
聽從乙旦木強劫蒙古恭布里代呢瑪班第秋吉  
京巴聽從牙藍丕勒行劫喇嘛所得牲畜俱在三  
十匹以上應遵刑部奏定章程卽照偷竊蒙古牲

畜新例定擬番子乙密殺課等三犯蒙古恭布里  
代等四犯均各依偷竊蒙古牲畜三十匹以上不  
分首從絞例俱擬絞監候入於秋審緩決辦理逸  
盜克木却果有兄察漢格弄不能禁約其弟爲盜  
應照刑例擬杖一百交旗鞭責發落各案逸盜嚴  
飭勒緝獲日另結並全案供招咨部謹

奏奉

硃批刑部速議具奏

道光二年十二月十八日會同西寧辦事大臣武  
公隆阿

奏爲佔踞河北番族及察漢諾們罕一旗全數渡河  
回巢河北肅清事 臣等竊查青海地方黃河以北  
全係蒙古河南有五旗蒙古其餘盡皆番族迨後  
番族強盛漸搶蒙古嘉慶元年經前任西寧辦事  
大臣策拔克奏准將察漢諾們罕移駐河北沙拉  
圖空地嗣後各野番因河南地狹人衆覬覦河北  
水草茂盛每乘冬令河水結凍伺便搶劫蒙古而  
各旗蒙古屬下苦其王公台吉等賦重政苛勾引  
野番搶掠報復察漢諾們罕屬下接濟勾引番子  
窩夥分賊屢經驅勦雖暫時獻賊交賊而我出則

三  
彼歸我歸則彼又出守則迄無期限勞費無窮勦  
則烏駭獸奔始終不能痛掃是以用兵一次則番  
衆輕肆愈甚近年以來蒙古被搶避入內地又有  
回漢奸民始則勾結野番及貧窮蒙古導引搶掠  
繼且並無野番假裝冒名任意搶劫蒙古則有以  
木旗而搶劫本旗漢奸則教引搶及馬廠事後率  
以野番肆搶呈報本年雖經長齡督兵進剿野番  
暫時回巢番族又復北渡盤踞邊境騷擾未臻靜  
謐臣那彥成仰承

恩命來甘查辦當卽奏請添設卡隘斷絕糧茶欽奉

硃批如此以防爲勦可爲上策

勅令盡心勉副委任臣嗣又將首重查拏漢奸嚴行懲

辦緣由具奏欽奉

硃批此乃正本清源之道

勅令計出萬全臣等仰蒙

指示曉夜籌維要在使之真心畏懼先清內奸卽絕外  
患隨分飭甘涼河肅西寧各提鎮於山徑要隘編  
設卡兵以防野番之侵突卽以斷私販之糧茶使  
各番族皆知卽此可制其生命庶生其畏懼之心  
所賴各營將備兵丁均能實力稽查顆粒絲毫不

能出口一面訪得漢奸巨盜麻木溝等密飭文武  
嚴拏獲案辦理具奏在案並拏獲夥盜數十人現  
在番案未獲各犯仍飭嚴拏務期盡絕根株並將  
偷挖金沙各犯一併緝獲照例懲辦現在西寧甘  
涼肅沿邊一帶業已廓清至察漢諾們罕及各野  
番素無積聚向冬窮蹙益甚屢次假冒蒙古進口  
易糧均經臣等查出分別懲治旋據察漢諾們罕  
親詣溫中稽顙乞命聲稱伊年幼無知不能約束  
其屬下今情願仍歸河南原牧但求免死等語臣  
等宣揚

皇上德威許以自新當卽派員押解渡河於十一月二十七  
日攜帶所屬蒙番全數回歸河南貴德原牧其各族野番  
內不通消息又不得糧茶入冬後已經凍餓道殣相望惶懼  
不知所之又因河南循貴各屬均設兵防疑畏不敢遽渡  
節經貴德廳營拏獲自番族逃出之蒙古占化等隨訊據供稱  
俱係青海蒙古被達倉等族番子擄去牧放牲畜本年自九  
月間斷絕糧茶野番等惟日食牛羊肉度命人多生病餓斃  
者亦復不少伊等受苦不過自番族逃出等情臣等本擬盡力懲創  
令其悉成餓殍

因念該野番等冥頑不靈罔知法度其鼠竊狗偷  
僅與蒙古相爲仇讎本不敢干犯邊鄙卽偶然犯  
法亦由漢奸從中教誘更非敢志在跳梁臣等仰  
體

皇仁暫爲窮寇開一線之路惟近年漢奸蒙古大半裝  
番劫奪必使黃河以北不留野番一人則漢奸蒙  
古均無可假借遇有搶案亦可辨其色目立予擒  
拏隨遣喇嘛乙希多爾濟札木洛碩等前往曉諭  
該野番平曰搶竊蒙古尙係私相讎寇惟潛踞河  
北則越界佔住干犯



天朝法令罪在必誅惟有作速渡河回巢從此安分守  
法尙可仰乞

聖恩貸其一死先據乙希多爾濟等稟報該野番等从  
已窮蹙正在進退維難之際聽聞曉諭俱各膜拜  
口稱番子等愚人無知誤犯

王法但求

大皇帝天恩免其餓死情願率領闔族渡河等語復據  
喇嘛札木洛碩帶同剛咱千布衆等族回巢野番  
頭目策楞甲等來寧面稱伊等番族偷住河北者  
貴德十六族循化十一族約一萬七八千人均已

對喇嘛等項經發咒永遠不過河北滋事隨即各  
由各渡口依次回巢現已全數過河等情臣等計  
算河北各番無以自存必自回巢先令貴德循化  
文武官員並添委幹員會同將河南各族野番清  
理戶口編查牌戶分立千戶百戶百總十總分別  
管轄與蒙古一律請票易買糧茶仍按戶口之多  
寡計口授食均由各族千戶就近在循化貴德廳  
營代為請票若有爲匪不法及偷渡河北之人卽  
不准代其請票易糧倘扶同徇隱惟該千戶是問  
所有野番南渡者卽在渡口查明本係何族卽交

何族千百戶遞管安插以散其衆並即將河南七八處渡口分派與該野番等把守倘有一人私渡卽將千百戶一律治罪如有大衆渡河伊等勢不能攔阻者立卽呈明廳營通稟總督與西寧辦事大臣查辦居常責成千戶代爲請票易買糧茶與現在河南各番一例辦理以示操縱在我順則安居樂業逆則枵腹爲憂舊住之番旣羣歸約束新歸之番亦不致驚疑現在分飭循貴廳營將回巢野番一萬七八千餘人查明族分分別交給各該族千百戶收管照依章程妥爲安插此時河北寶

已肅清仍令該廳營造具戶口清冊呈報到日另錄清單恭呈

御覽臣等體察夷情大抵合則勢強而難制分則力弱而易防向來驅逐番帳既經渡河不爲經理是以去而復返茲野番回巢之後既分之以廳屬又束之以戶總則循化之番不得混入貴德此族之番不得混入彼族復於各族中分立千戶等員各歸管束其門戶既別則其勢愈分其力愈弱其心愈散而不能復聚從此稽查約束當無虞再肆騷張此皆仰承

聖明指示得於三月之內迅速肅清蠢爾番族至今始知其日用飲食一絲一粟無不仰給內地但經禁絕立制生命法重攻心卽可不勞而定此後亦擬將該番族比照玉樹番子之例立定貢馬章程每年不過數百金每戶亦止出銀一二錢在

國家原不須此而該野番自知納馬之人亦不敢不遵約束卽藉之以示騁靡仍令每年至西寧辦事大臣衙門點查一次無過則賞有罪卽懲應立章程亦容臣等細心斟酌具奏謹

奏

道光三年正月初三日軍機大臣字寄奉

上諭那彥成等奏河北野番及察漢諾們罕全數回巢  
並酌移河南四旗蒙古各一摺青海黃河以北屢經  
番族佔據察漢諾們罕一旗復勾結漢奸夥同搶掠  
經那彥成等設卡防堵斷絕糧茶並訪獲漢奸巨盜  
及偷挖金砂各犯分別懲治現據察漢諾們罕稽顙  
乞命所屬蒙番全數押回河南貴德原牧各族野番  
勢已窮蹙自可寬其一線惟河北不可復留野番一  
人使漢奸蒙古無可假借方爲正本清源之道所有  
偷住河北之貴德循化各番族共一萬七八千人現

已全數回巢著該督等派委幹員卽將河南各族野  
番逐一編查設立千戶百戶等分別管轄仍各按戶  
口與蒙古一律易買糧茶由各族千戶就近代爲請  
票如有爲匪不法及偷渡河北之人卽不准請票易  
糧並著於野番南渡時查明本係何族卽交該族千  
百戶遞管安插各處渡口分派把守倘有一人私渡  
卽將該千百戶一律治罪該番族經此次懲創之後  
管束旣嚴門戶亦別其勢愈分其力愈弱自屬一勞  
永逸之計其請將該番族比照玉樹番子之例立定  
貢馬章程於約束之中仍寓羈縻之意著卽妥議章

程具奏

道光二年十二月十八日會同西寧辦事大臣武

公隆阿

奏爲酌移河南四旗蒙古以實河北曠土並安插河北各旗蒙古令安游牧事竊西寧河北佔住野番均已渡河回巢所有避居內地之蒙古自應諭令出口照舊游牧前經臣等議將各旗業古安插瓊科一帶並於察漢托洛亥地方添設換防兵丁一千名以資捍衛奏蒙

聖鑒在案臣等伏查察漢托洛亥之西爲大山逾山而



西爲助勒蓋貢額爾等處原係六旗蒙古札薩克  
貝勒特里巴勒珠爾等牧界自野番渡河搶劫該  
六旗札薩克不克安居移至西寧沿邊一帶居住  
嗣又紛紛避入內地本年長齡帶兵驅逐野番該  
六旗札薩克因助勒蓋等處密邇番地僅隔一河  
不敢各歸原牧呈請繳還遊牧之地入官經長齡  
奏明將助勒蓋指給察漢諾們罕住牧卽令其防  
河臣等現查該諾們罕屬下窩夥分贓業將該諾  
們罕及所屬蒙番全數押回貴德原牧所有六旗  
札薩克牧界沿河北岸有七百餘里之遙均成曠

土雖大山以東駐有官兵而相距二三百里野番偷渡無由知悉該處地形遼濶勢難遍駐防兵且亦不能終歲設防虛糜

帑項

臣

等再四籌商因思河北地曠人稀河南地狹

人衆現在野番全數回巢循貴廳屬幾有人滿之患蒙古札薩克郡王達什仲鼐等四旗均住河南較河北各旗稍爲富強而在河南日與番子相仇漸已難支更兼此時河北不安分之番全行渡歸河南將來擾累更甚

臣

等籌商莫若將該四旗移駐河北空地伊等既可免野番滋擾而居住河北

亦可作內地屏藩隨將該郡王等傳至西寧郡城  
詢其願否移居無須勉強該郡王達什仲飛台吉  
恭布多爾濟瑪濟格策楞昂濟勒多爾濟策夫坦  
僉稱伊等住牧河南與野番賀爾族係屬世仇屢  
被賀爾族侵掠報復不遑安處近年人戶甚爲凋  
弊如蒙准令遷居助勒蓋一帶與各旗蒙古唇齒  
姻情愿卽日遷居助勒蓋一帶與各旗蒙古唇齒  
相依等語隨據親遞情願移居河北呈詞存案當  
卽酌賞給遷居口食並諭以每年春夏二季黃河  
水大野番難以偷渡至冬令冰橋結凍番子可以

聚衆渡河之時仍派兵數百照料巡查平時若有番子偷渡卽令飛報官兵立即帶領伊等擒勦該四旗同聲觀感卽回原牧議遷去後臣等一面飭飭循貴營員帶領弁兵於該郡王移居時沿途護送該郡王等於正月內可抵河北分旗住牧其該郡王等所遺河南牧界仍飭循貴廳營審看番族情形如有實在不敷游牧者再行酌量分給居住從此河北蒙古河南野番此疆爾界各不踰越至河北原住二十四旗蒙古除台吉恩克巴雅爾住牧柴達木額色爾津地方去西寧一千六百餘里

野番不往搶劫該台吉尙堪自衛外其餘二十三旗札薩克大半避入內地丹噶爾大通一帶並有貧窮蒙古散處甘涼肅寧邊內插帳住牧及沿途乞食者臣等檢查青海衙門嘉慶十五年查造各旗戶口冊檔該二十三旗共蒙古四千五百餘戶現已分飭該蒙古王公台吉查明隨同住牧者共若干戶其業經散失者共若干戶據實呈報現已來寧接見者九旗內惟台吉索諾木敏珠爾索諾木旺濟勒兩旗呈稱所有屬下蒙古尙未散失其貝勒札木巴勒多爾濟等七旗均已散失過半其

餘未經報到之十四旗現在催令呈報一面分飭甘涼寧肅各府州縣於編查邊內居民保甲時卽將插帳住牧之蒙古查明另冊稟報並因時屆冬令各屬現開粥廠貧苦討乞之蒙古必往就食亦令各府州縣細心查看如有蒙古卽詢明姓名旗分造冊呈送仍展放一月俟正月底撤廠後再將該蒙古等分起註明屆時再派委員分起押交各該旗王公台吉領回住牧其實在貧苦帳房產產俱無者一令出口無以自活臣等儘力自行捐賞口食銀兩倘人數過多力有不逮再行籲懇

天恩酌發賞需總不准內地存留一名蒙古亦不准蒙古界內私藏一名漢奸至青海迤北瓊科地方甚爲寬廣足敷各旗住牧其有現在住牧得所不願歸瓊科地方者亦聽其便所有各蒙古帳內潛住之漢奸仍加嚴查以杜教引蒙古之弊如此辦理則蒙古旣遠野番搶劫之禍再無漢奸教引庶可得安生業數年後冀可少復元氣謹

奏

謹案道光三年正月初三日廷寄內奉

上諭那彥成奏河南四旗蒙古札薩克郡王達什仲鼐

等較河北各旗稍爲富強因屢被野番賀爾族侵掠  
不遑安處請遷居河北助勒蓋一帶酌給口食並派  
循貴營員沿途護送等語該四旗蒙古游牧河南已  
久此時若令移居河北是先示番賊以弱如移駐後  
該蒙古不能自固藩籬或番賊復行渡口搶掠仍恐  
不能相安此事務當籌畫萬全不可輕議更張致將  
來又滋流弊其河北原住二十四旗蒙古除台吉恩  
克巴雅爾一旗尙堪自衛外餘二十三旗札薩克大  
半避入內地並有散處邊內插帳住牧及沿途乞食  
者自應妥爲安置所有各旗蒙古散失戶口著該督



卽飭令各府州縣於編查邊內居民保甲時查明該  
蒙古姓名旗分分起押交各該旗王公台吉領回住  
牧其實係窮苦無依者如捐賞口食銀兩尙有不敷  
卽著奏明酌發賞需以資接濟該督等務須妥爲經  
理使內地不致存留蒙古亦不使蒙古界內私藏漢  
奸俾各安生業永靖邊陲方爲不負委任

道光三年正月十八日會同西寧辦事大臣武公  
隆阿

奏爲審明續獲隨同野番搶劫肅州馬厰之重犯卽  
行正法事竊臣等前將拏獲首犯麻木溝究出該

犯與在逃之趙牙信韓百林教誘野番勾結野牛  
溝私金廠頭人趙五拜阿渾等共二十餘人搶劫  
肅州馬廠各等情當飭各該處文武員弁先後拏  
獲趙六拜阿渾馬木頭拜老三唐五黃阿渾李鬍  
子馬八馬二等九犯於審明後將麻木溝同趙六  
等八犯卽行正法聲明尙有續拏之夥黨均應待  
質將馬二一犯暫緩正法其餘未經獲解各犯嚴  
飭勒緝務獲在案嗣向馬二研究未獲夥黨現在  
逃匿何處據馬二供稱聞得趙五馬林馬仲甸馬  
四十八韓壯石背銅子馬承保馬進伏等現仍藏

匿野牛溝金廠等語當經飭各該處文武員弁  
嚴密查拏去後旋據將趙五等八犯均在金廠附  
近全行拏獲並將先在安肅道衙門呈控麻木溝  
等搶劫之原告田全暨其弟田老六一併獲解前  
來臣等督率委員道府隔別研審該犯趙五馬林  
馬仲甸馬四十八馬承保石背鍋子韓壯馬進伏  
等自知罪犯必死雖經晝夜熬審堅不吐實迨監  
提待質之馬二先後逐一質証該各犯等始各俯  
首無辭一一供認屬實其田全田老六卽田老二  
兩犯堅供伊弟兄二人於上年六月十三日因麻

木溝同馬進伏等將伊身帶金子搜搶伊等卽回肅州在安肅道衙門呈控候審七月初間伊等並不在金廠內委未隨同搶劫馬廠等語申辯甚力質訊馬二亦稱田全田老六委係於六月半間卽回歸肅州並未隨同搶劫馬廠不敢謊供復詰訊馬進伏供因田全在安肅道衙門呈控伊等搶劫以致破案是以挾恨妄扳其實搶劫馬廠時田全田老六亦均未同去各等供臣等隨提犯覆加研訊緣趙尙伏係靈州回民馬林馬四十八俱係肅州回民馬仲甸馬進伏俱係狄道州回民馬承保

係河州回民石背鍋子係張掖縣漢民田全田老  
六係肅州回民先後至野牛溝私金廠偷挖金砂  
趙五與田全並置買口糧運赴金廠給衆食用因  
此廠內人俱呼爲大掌櫃凡有赴廠挖金砂者須  
先向趙五等言明方許淘挖其馬林馬仲甸等犯  
俱有僱工四五人至七八人不等人俱呼爲二掌  
櫃已正法之麻木溝亦常至金廠偷挖金砂與趙  
五等俱相熟識道光二年六月十三日麻木溝同  
現獲之馬進伏等因與田全挾有口角嫌隙將田  
全身帶金砂二兩零搜搶俵分七月初間有角昂

族野番頭目羣增並察漢諾們罕番旗沙哈加藏  
根帶領四五十人來至東瑣地方麻木溝等教令  
該番族往肅州馬廠搶劫馬匹並稱金廠人可以  
領路隨先至金廠向趙五等告知角昂族野番等  
隨後踵至廠內僱工人等畏懼跑避其頭人內已  
正法之趙六拜阿渾馬木頭拜老三唐五黃阿渾  
李鬍子馬八暨現獲之趙五馬林馬仲甸馬四十  
八韓壯石背鍋子馬承保馬進伏並未獲之李二  
班姜有才唐三等約共二十餘人俱著野番衣帽  
分執刀棍帶領野番人等同至肅州馬廠適值兵

丁數人趕馬在陶賴川飲水隨一同上前搶劫官馬五百餘匹跑逸因官兵追趕將馬沿路丟棄止剩得馬八九十匹野番盡數趕去將所騎馬匹換給金廠衆人每人一二匹不等維時田全因被麻木溝等搶伊金砂不甘先回肅州卽以麻木溝馬進伏等身穿番衣番帽攔路劫奪等情在安肅道衙門呈控旋即仍赴金廠經臣等委員先後拏獲俱各供認前情不諱並訊明已獲之田全田老六於六月內回歸肅州七月初間並未在金廠內委無同搶馬廠情事隔別研訊供情脗合查例載響

馬強盜執有軍器白曰邀劫道路贓證明白者不分人數多寡曾否傷人依律處決梟示又盜犯明知官帑糾夥行劫但經得財將起意爲首及隨同上盜者擬斬立決梟示又例載盜掘金砂若聚衆至三十人以上者不論砂數多寡及初犯再犯爲首發近邊充軍爲從枷號三個月又例載民人無票私行出口者杖一百流二千里各等語今趙五等聚衆盤踞野牛溝偷挖金砂已屬不法復敢騎馬持械引領野番至肅州馬廠搶劫官馬均屬罪不容誅趙五馬林馬仲甸馬四十八韓壯石背鍋



子馬承保馬進伏等八犯均應卽照響馬強盜執  
有軍器白日邀劫道路賊證明白者不分人數多  
寡曾否傷人依律處決梟示例俱斬決梟示該犯  
等罪大惡極未便稽誅臣等於審明後將該犯等  
卽行正法傳首犯事地方以昭炯戒田全田老六  
二犯訊明並未隨同搶劫馬廠惟俱私行出口偷  
挖金砂且田全與趙五均訊係同夥盤踞金廠爲  
首之人計其夥掘人數已在三十人以上田全合  
依盜掘金砂聚衆至三十人以上爲首例擬杖一  
百發邊遠充軍田老六除掘金砂爲從輕罪不議

外合依無票出口例擬杖一百流二千里均分別  
定地發配折貴安置野番等搶去官馬業經頭人  
疑卡塔爾獻出八十二匹現飭肅州鎮總兵派員  
前來認領逸犯李二班等嚴飭勒緝獲日另結其  
留質之馬二供出金廠爲首之趙五暨馬林等潛  
匿確實地方俾得迅速就獲且於趙五等到案時  
逐一質證審得實情伏查例載如有夥盜供出爲  
首之盜逃匿確實地方於限內拏獲者將供出之  
夥盜免死發遣等語茲馬二供出之趙五等雖非  
首盜惟此案係不分首從俱擬斬梟且趙五等八

犯均因馬二供明逃匿處所旬日之間全行弋獲  
馬二一犯似屬情稍可原應否照例免死發遣之  
處伏候

聖裁謹

奏奉

硃批刑部議奏

道光三年正月十八日會同西寧辦事大臣武公  
隆阿

奏爲野番全數渡河查出厯年搶竊官馬賊物及熟  
番婦女現在逐細編查保甲並遵

旨酌將河南四旗蒙古仍留原牧事竊臣前因察漢諾們罕及佔踞河北番衆掃數渡河回巢當將河北肅清並酌移河南四旗蒙古以實河北曠土各緣由奏明在案道光三年正月十五日承准軍機大臣字寄奉

上諭那彥成等奏河北野番及察漢諾們罕全數回巢並酌移河南四旗蒙古一摺青海黃河以北屢經番族佔踞察漢諾們罕一旗復勾結漢奸夥同搶掠經那彥成等設卡防堵斷絕糧茶並訪獲漢奸巨盜及偷挖金砂各犯分別懲治現據察漢諾們罕稽顙乞

命所屬蒙番全數押回河南貴德原牧各族野番勢已窮蹙自可寬其一線惟河北不可復留野番一人使漢奸蒙古無可假借方爲正本清源之道其請將該番族比照玉樹番子之例立定貢馬章程於約束之中仍寓撫摩之意著卽妥議章程具奏至另摺奏河南四旗蒙古扎薩克郡王達什仲籠等較河北各旗稍爲富強因屢被野番賀爾旗侵掠不遑安處請遷居河北助勒蓋一帶等語該四旗蒙古游牧河南已久此時若令移居河北是先示番賊以弱如移駐後該蒙古不能自固藩籬或番賊復行渡口搶掠仍

恐不能相安此事務當籌畫萬全不可輕易更張致將來又滋流弊欽此仰見

皇上至聖至仁無微不照於整飭邊務之中寓綏柔遠  
人之意跪讀之下曷勝欽佩臣等連日嚴催循貴  
文武委員將回巢之察漢諾們罕屬下及野番各  
旗逐細編查並將請票易糧章程寫成番字告示  
給散於編查後准其請票易買糧茶若有青海蒙  
古迴至河南者卽爲分出仍押交青海各旗扎薩  
克具領節據該委員等稟稱該諾們罕屬下及野  
番各旗由各渡口蹕冰渡河實在不下一萬人牛

羊駝馬以億萬計循貴河濱二百餘里番帳相望  
該委員等自十二月中旬逐一清查戶數人數按  
照奏定章程分立千戶百戶百總十總實緣該番  
族自知犯法於無人處所偷渡散漫山中迄今一  
月之久查辦甫及五六分於該諾們罕旗下及野  
番內已查出隨同住止並被擄之蒙古共一百餘  
戶又阿里克番子二十三戶均分交青海各旗及  
阿里克百戶收領正在編查間有野番汪什代克  
族頭人疑卡塔爾稟稱伊屬下人等曾隨同漢奸  
搶得肅州馬廠官馬八十二匹伊恐被官兵查出

致干重罪情願獻出又續據蘊依族頭人瓦洛獻  
出歷次搶竊官馬七匹又其屬番子等獻出搶過  
客商馬騾三十餘匹又阿楚克族番子獻出搶過  
堪布貨物又江什代克族頭人才大旦加獻出擄  
掠搶丹噶爾熟番婦人哈莫一口並據兵役於番  
地內查出漢奸馬得林馬朶黑等二名現均分別  
解到西寧傳齊肅州牧弁等及各事主認領其漢  
奸二名照例究辦並據該委員等將回巢各族著  
名頭人羣本末等二十八名先後帶至西寧謁見  
臣等宣揚



皇上德威貸其重罪卽將渡口交各該番頭目責令看守毋得縱放其族內匪徒復渡河北滋事該番等叩頭悔罪情願把守渡口自贖並照玉樹番子之例每歲納馬永爲

盛世良番其畏服情形似屬出於至誠臣等因該番等均係有罪之人雖荷

天恩寬貸若遽與河南千百戶等一律賞給頂戴未免過優是以止令承充戶總並未賞給頂戴亦未另予賞號諭俟看守渡口一二年後如果野番絕跡再行賞給頂戴該番等但求索得糧茶度命亦不

收再望賞號均各祇遵回巢臣等當派勤幹將備  
分往河北各路探查據稟僉稱並未見有番帳河  
北實已肅清惟回巢各番散處河濱誠恐該委員  
等查辦或有遺漏舛錯復專派西寧鎮總兵穆蘭  
岱前往督辦並酌定貢馬守渡各章程事事期於  
切實周妥萬不敢粉飾草率敷衍目前至河北六  
旗蒙古退出牧地千有餘里隣近河濱水草極盛  
爲番族日夜覬覦之地欲議防禦非屯田及移營  
不可於斯二者約畧估計均需帑金數百萬

國家經費有常何敢冒昧請行前此爲萬不得已之

計奏請將河南郡王達仁仲鼐等四旗蒙古移住河北以實曠土原不能責成其防堵野番不使潛渡但此曠土沃壤得四旗分處其間如有野番渡河該郡王等亦可報知營汛隨時驅逐且該郡王等在河南日與番族相仇亦非樂土是以奏請遷移茲荷

聖明指示計及長久實非<sub>臣</sub>等愚淺思慮所及應欽遵諭旨仍守舊章令該郡王等毋庸遷移以示撫綏<sub>臣</sub>等再四熟籌欲防野番不渡河北必先嚴查於河南總在地方文武勿怠勿率實力稽查事事從實時

時加謹乃得行之可久應請嗣後責成西寧鎮道  
於春秋二季輪往循貴點驗門牌戶口如有一戶  
逃亡卽向該管戶總嚴追下落倘係潛渡河北卽  
詢明住止所在飛報西寧大臣總督兩衙門嚴切  
辦理立往擒拏但得實力奉行不怠不欺庶不致  
漫無稽考復致多人偷渡謹

奏

道光三年正月十八日會同西寧辦事大臣武公  
隆阿

奏查青海各旗蒙古近年以來因被野番等搶掠紛

紛避入內地臣等分飭沿邊營縣確查戶口諭令  
移回原物或搬至瓊科一帶住止其貧窮無力者  
酌賞口食俟春融後交各該旗具領仍令各卡將  
弁於蒙古出口時點查人數稟報節據西寧甘涼  
各營縣等稟稱內地住坐蒙古不下二萬餘人其  
貧窮無力者尙不過十之一二各屬雖設有粥飯  
而該蒙古等不慣食粥已酌給炒麵以資果腹俟  
出口時再爲加賞行糧復向該蒙古等宣諭令其  
出口據該蒙古等僉稱我們因避野番搶劫移至  
內地蒙

大皇帝不加驅逐今又遣大人們來懲辦野番斷絕糧  
茶又爲我們拏盡漢奸自上年十月以後我們各  
旗蒙古從無被搶之事今野番等受餓不過俱已  
渡河回巢我們從此可以各安游牧實在感激情  
願卽日搬移出口等語現據各卡逐日稟報每日  
出口蒙古自數百人至數千人不等大約二月初  
旬連貧窮蒙古可以掃數出口俟將野番戶口清  
查後亦將各旗蒙古戶口清查不使容留漢奸所  
有曾經搶劫行強之蒙古亦均令其按名交出蒙  
古內不留一漢奸不留一作賊之人方爲完善

臣

等愚淺智慮所及實力辦理邊務所關愈至末局  
愈加慎重萬不敢少有草率欺飾謹

奏

道光三年二月初二日軍機大臣字寄奉

上諭那彥成等奏據循貴文武各委員將回巢之察漢  
諾們罕屬下及野番各族逐細編查已查出歷年搶  
竊官馬贓物及熟番婦女現將渡口交各番頭目看  
守並遵旨將河南四旗蒙古仍留原牧等語回巢各  
番散處河濱欲其不渡河北全在地方文武員弁實  
力稽查周詳妥善俾野番自然懾服乃可歷久相安

那彥成等此次督飭查辦河北實已肅清其叩頭悔  
罪看守渡口之番目等承充戶總並未賞給頂戴亦  
未另予賞號著俟一二年後如果野番絕跡再行奏  
請賞給頂戴並著嗣後責成西寧鎮道於春秋二季  
輪往循貴點驗門牌戶口如有一戶逃亡卽向該管  
戶總嚴追下落倘係潛渡河北詢明住所飛報西寧  
大臣總督衙門立往擒拏嚴切究辦編查番族爲邊  
疆要務那彥成等務當按照奏定章程飭屬奉行勿  
怠不可視爲具文以致番族覬覦復行偷渡也

道光三年正月十八日會同西寧辦事大臣武公



隆阿

奏爲審明疊次搶劫之重犯卽行正法事竊臣等前因拏獲盜犯麻木溝盧麻子審出糾夥搶劫各情將該犯等供出夥黨開列籍貫年貌劄飭各該屬嚴拏務獲奏蒙

聖鑒在案嗣據各該屬先後拏獲已正法麻木溝夥黨殷添才盧麻子夥黨旺悟康鳳卿暨康鳳卿之父兄康大定康鳳濟並買贓之陳紹賢陸續解至西寧臣等當飭委員道府逐加嚴審據殷添才旺悟康鳳卿俱供明夥同搶劫實情惟康鳳濟僅止夥

竊康大定亦止知情分贓並訊明陳紹賢收買麻  
木溝盧麻子盜贓屬實<sub>臣</sub>等復提各犯逐一研訊  
緣殷添才與盧生得卽盧麻子俱係山丹縣人旺  
悟係郡王沙克都爾旗下蒙古康鳳卿與父康大  
定兄康鳳濟係陝西郃陽縣人康大定於早年來  
山丹縣屬永固地方生理嘉慶五年間僱盧麻子  
在家傭工卽置買梭布口糧等物每年與盧麻子  
出口在各蒙古處貿易至嘉慶十六年間康大定  
年老不復出口令子康鳳濟康鳳卿跟隨盧麻子  
出口學做生意盧麻子素性嗜酒康鳳濟等年輕

好賭將貿易貨物大半花費盧麻子慮及回家難  
與康大定交賒隨起意商同康鳳濟等乘間偷竊  
蒙古牲畜以便攜帶回家隨於是年五月不記日  
期夜間同偷得不知旗分蒙古羊五十餘隻馬四  
匹趕回家內經康大定查問盧麻子不能隱瞞將  
偷竊實情告知康大定卽將馬羊陸續變賣使用  
十八年間盧麻子又同康鳳濟至口外收賒乘間  
偷得蒙古拉哩幹家牛十隻馬七匹回家變賣分  
用迨二十一年後康大定令康鳳濟在家開舖貿  
易止令康鳳卿與盧麻子一同出口是年八月內

盧麻子起意商允康鳳卿同去搶劫盧麻子執木棍一根康鳳卿帶馬刀一把各騎馬匹至察罕古爾地方搶得蒙古鐵禮藏根帳房牛七隻回家變賣分用二十三年四月內盧麻子又同康鳳卿各騎馬匹分攜刀棍至察罕托亥地方搶得吳羊頭家牛六隻回家變賣分用康大定與康鳳濟俱屬知情至二十四年間康大定因野番時來搶劫將所養牛羊馬匹全行售賣盧麻子亦卽辭工回家二十五年間盧麻子出口收賬適遇野番十數人令伊領路盧麻子隨帶領野番搶得黃番羊五六

百隻牛二十餘隻野番分給盧麻子羊一百餘隻  
牛七隻賣給陳紹賢得錢八十千文花用道光二  
年七月內盧麻子在三個俄博地方與康鳳卿會  
遇盧麻子商同搶得蒙古多爾濟布馬三匹趕至  
素識之蒙古旺悟帳房住歇盧麻子復起意商同  
旺悟並康鳳卿出外搶劫旺悟隨托伊隣居跌拉  
格看守帳房與盧麻子康鳳卿各騎馬匹分攜刀  
棍至硫黃溝地方見有事主馬得伏牧放牛隻隨  
一同上前搶得牛八隻趕走康鳳卿在後被看牛  
之蒙古婦人拜太追趕將馬韁拉住不放康鳳卿

情急隨用刀將拜太連砍二下鬆手康鳳卿脫逃  
追及盧麻子等告知情由將牛趕回旺悟帳房宰  
食一隻分給看帳房之跌拉格牛腿一條盧麻子  
旋將賊牛趕至紅水售賣被事主馬得伏認獲報  
官盧麻子等分路逃走先後被獲其殷添才一犯  
於嘉慶二十一年間因竊牛犯案經山丹縣枷責  
釋放後至役營馬廠地方傭工與已正法之麻木  
溝認識二十四年三月內麻木溝起意商同殷添  
才與已故之楊格楞出外搶劫隨各騎馬匹持械  
同至黃城灘地方搶劫得不認識蒙古馬二十四匹

變賣俵分四月內麻才溝又邀同殷添才在巴爾吐地方搶得不認識蒙古牛四隻羊二十餘隻變價俵分經麻木溝供出被獲至買贓之陳紹賢係永昌縣人在永固地方開舖生理於嘉慶十七年間置買梭布米麵等物出口與各蒙古貿易每年一次至二十一年間因僱工丁建輞過河淹斃並將賬簿失落不復出口在羊胸子地方牧養孳生牲畜二十五年間盧麻子將搶去所得之羊一百餘隻牛七隻賤價售賣陳紹賢貪圖便宜知情買得道光二年七月內已正法麻木溝之夥黨趙牙

信將搶劫所得之羊三十隻售賣陳紹賢貪圖便宜知情買得變賣使用被廬麻子等供出被拏以上各犯俱審據各供前情不諱研究再無糾夥竊劫別案及爲匪不法別情事主拜太傷經平復應卽照例分別定擬查例載響馬強盜執有軍器白曰邀劫道路賊證明白者俱不分人數多寡曾否傷人依律處決梟示又洋盜案內知情接買盜賊二次者發近邊充軍又強盜同居父兄有知情又分贓者如本犯問斬減一等滿流又蒙古例載偷竊牲畜十匹至二十匹者爲首絞監候爲從同行



分贓者發遣雲貴兩廣煙瘴地方各等語今殷添才夥同已正法之麻木溝搶劫二次盧麻子糾夥搶劫四次又同野番搶劫一次康鳳卿夥同盧麻子搶劫四次又用刀將事主砍傷蒙古旺悟夥同搶劫一次均屬罪不容誅除旺悟一犯於取供後在監病故應毋庸議外殷添才盧麻子康鳳卿三犯均合係響馬強盜執有軍器白日邀劫道路贓證明白者不分人數多寡曾否傷人依律處決梟示例斬決梟示臣等於審明後將該犯等卽行正法傳首犯事地方示衆以昭炯戒陳紹賢知情接

買盧麻子等贓二次非尋常買贓者可比應卽比照洋盜案內知情接買盜贓二次者發近邊充軍例杖一百發近邊充軍康鳳濟聽從盧麻子偷竊蒙古牲畜二次內偷竊拉哩幹家一次計牛馬共十七匹康鳳濟應照偷竊牲畜十匹至二十匹爲從同行分贓者發遣雲貴兩廣煙瘴地方例發雲貴兩廣煙瘴地方事犯雖在嘉慶二十五年八月二十七日

大赦以前惟係在蒙古地方偷竊牲畜不准援免康大定明知康鳳卿搶劫情事分得贓物應照強盜同

居父兄知情又分贓者如本犯問斬減一等滿流  
例杖一百流三千里與陳紹賢康鳳濟分別到配  
折責安置蒙古跌拉格訊明並未夥同搶劫業經  
病故應毋庸議康大定陳紹賢資財封變入官充  
賞防卡及捕盜出力兵役全案供招照例咨部再  
查<sub>臣</sub>等審辦漢奸蒙古各案斬犯三十三名絞犯  
十三名連軍流犯七十六名徒犯十五名均已分  
別奏咨辦理現獲尚未審結者仍有一百三十餘  
名西寧府縣監獄房間窄狹恐有疎虞是以罪應  
立決人犯<sub>臣</sub>等俱卽按律處決其軍流徒人犯於

審定後解省分禁聽候部覆至各案未獲漢奸各犯除趙牙信韓百林二首犯外尚有二十餘名臣等仍嚴飭勒緝務獲究辦謹

奏奉

硃批刑部議奏

道光三年正月十八日會同西寧辦事大臣武公隆阿

奏查西寧甘涼河肅沿邊一帶俱經先後安設卡兵四千餘名現在野番全數渡河回巢河北業已肅清自應撤回卡兵以節經費惟現在沿邊一帶查

拏漢奸必須各口隘設有卡兵方不能偷越遠竄  
卽將來蒙古出口各歸原牧亦須官兵彈壓照料  
現經臣等酌議所有河州洮州巴燕戎格各處卡  
兵只係查拏私販糧茶目下野番旣已歸巢自應  
全撤其甘涼寧肅一帶亦俱於歲底撤回十分之  
五俟二月內各旗蒙古出口再行全數撤回歸伍  
謹

奏奉

硃批知道了

道光三年二月初九日會同西寧辦事大臣武公

隆阿

奏爲續獲夥同搶劫之重犯卽行正法事竊臣等前經拏獲巨盜麻木溝岳昇等審明正法並因岳昇案內逸犯尙多將岳昇之弟岳興暫行留質並飭各該屬嚴拏肆行搶劫之漢奸暨麻木溝等案內夥黨期無漏網節次奏蒙

聖鑒在案嗣據各屬拏獲已正法之麻木溝夥黨海金斗一犯又聽從在逃馬滿拉夥劫之張誠田貴羅布藏索南木五十八四犯並已正法岳昇等案內供出之索泳保索泳富二犯先後解至西寧惟夥

同麻木溝疊劫之要犯趙牙信韓百林日久未獲  
復經嚴飭沿邊營縣購線緝拏務在必得卽據大  
通縣應曙霞密派幹役躡訪知該二犯由涼州竄  
入境內卽行拏解前來臣等隨督飭委員道府等  
逐一嚴審據趙牙信韓百林海金斗俱供認夥同  
麻木溝搶劫並據張誠與田貴羅布藏索南木五  
十八亦各供認先後聽從在逃之馬滿拉搶劫其  
索泳保索泳富二犯再三研訊委止私行出口貿  
易並無隨同岳昇等搶劫情事監提留質之岳興  
供明係伊挾仇妄扳各等情臣等隨提犯逐加覆

訊緣趙牙信韓百林俱係河州回民曾經犯竊責  
釋海金斗係陝西臨潼縣回民寄居甘州因在野  
馬川地方強索過客羊毛錢文犯事擬軍遇

赦釋回俱與麻木溝素識道光二年四五月內先後至  
野馬川與麻木溝結夥同住七月初間趙牙信韓  
百林與麻木溝在東瑣地方會遇野番四五十人  
麻木溝教令搶劫肅州馬廠並與趙牙信先至野  
牛溝金廠向其頭人已正法之趙五拜阿渾莫頭  
等說明領路韓百林同野番隨後踵至各騎馬匹  
分持器械同至肅州馬廠搶得官馬五六百匹因



官兵追趕將馬沿途丟棄只剩得馬八九十匹趙  
牙信韓百林各分得馬二三匹不等又是月內不  
記日期趙牙信韓百林與海金斗並已正法之麻  
木溝虎三等帶領野番一百餘人各騎馬匹分執  
刀矛至二道溝地方遇見不知姓名脚戶二十餘  
人趕有米麵貨物一百餘駄野番等放鎗傷斃一  
人又刀傷一人趙牙信等與野番一齊上前將貨  
駄全行搶劫又同野番至察罕俄博地方搶得民  
人牧養牛羊一千餘隻趙牙信韓百林海金斗各  
分得馬牛騾隻銀兩不等又另案拏獲之張誠原

係蒙古本名羣本經大通縣已故民人張才自幼  
抱養爲子嘉慶二十四年八月內聽從在逃之山  
丹縣人馬滿拉帶領郡王沙克都爾等旗下蒙古  
素木里宗都班第一共十四人各騎馬匹分持器  
械至大通河地方搶得蒙古巴燕卡等家牛羊四  
百餘隻並帳房內什物俵分又於二十五年八月  
內聽從馬滿拉帶領蒙古素木里宗都班第一  
共十二名各騎馬持械搶得不認識蒙古帳房牛  
七十餘隻羊二百餘隻俵分又另案拏獲之田貴  
卽田三係大通縣回民羅布臧索南木係西藏喇

嘛至野馬川地方居住已十餘年五十八係郡王沙克都爾旗下蒙古均素相熟識於道光二年八月十九日聽從在逃之馬滿拉並未獲之吳光寬塔布素却爾拾布等一共七人出外搶劫俱著野番衣帽騎馬持械至三個泉子地方搶得不認識人羊二十隻騾三頭俵分又岳昇案內拏獲之索泳保索泳富二犯俱係山丹縣回民訊據供稱伊兄弟二人於嘉慶十六年後每年置買口糧梭布貨物私行出口在各蒙古交易換羊毛羊皮等物俱招娶蒙古婦人牧養孳生牛羊並未與岳昇岳

七等一同搶劫因岳昇等於二十五年間偷入牛  
隻經索泳保告知事主指名控告並於上年十二  
月內官兵緝拏岳昇岳七等時索泳富充當鄉保  
引領將岳昇等拏獲因而挾恨誣扳等語當卽監  
提留質之岳興卽岳七與索泳保等面證據岳七  
供明係挾仇妄扳屬實以上各犯均經各營縣先  
後拏獲訊據各供前情不諱研究再無另有不法  
別案旋據西寧縣申報張誠羅布藏索南木二犯  
俱於取供後先後在監病故至留質之岳七一犯  
其案內逸犯弋獲無期且將伊供出之索泳保索

泳富孥獲到案訊明係屬挾仇誣扳未便再行稽  
誅應卽與趙牙信等按例定擬查例載響馬強盜  
執有軍器白日邀劫道路賊證明白者不分人數  
多寡會否傷人依律處決梟示又盜犯明知官帑  
糾夥行竊但經得財將起意爲首及隨同上盜者  
擬斬立決梟示各等語此案除夥同搶劫應擬斬  
梟之張誠羅布臧索南木俱於取供後在監病故  
應毋庸議外趙牙信韓百林海金斗田貴五十八  
暨留質之岳興卽岳七俱裝番持械肆行搶劫趙  
牙信韓百林並膽敢夥同搶劫官馬均屬罪不容

誅趙牙信韓百林海金斗田貴五十八岳七等六  
犯均合依響馬強盜執有軍器白晝邀劫道路賊  
證明白者俱不分人數多寡曾否傷人依律處決  
梟示例斬決梟示該犯等罪大惡極未便稽誅當  
經臣等於審明後將該犯等卽行正法傳首犯事  
地方以昭炯戒各案逸犯仍飭各該屬嚴緝務獲  
另結索泳保索泳富二犯均經質訊明確並未與  
岳七等夥同搶劫其私行出口貿易應照例擬流  
另行咨部核辦謹

奏奉

硃批刑部知道

道光三年二月初九日會同西寧辦事大臣武公  
隆阿

奏爲各旗蒙古全數出口仍嚴拏賊犯以昭懲創請  
賞口糧以示懷柔事竊青海札薩克蒙古住居河  
北者二十四旗與河南番族本係世仇而各札薩  
克王公台吉等任性貪殘不惜其下因而導引野  
番搶掠其主又有內地奸民從而勾結教誘以致  
蒙番夥劫擾及沿邊一帶是欲斷蒙番之內線必  
先懲辦漢奸而欲禁野番之北渡必先清查蒙古

卷三十一  
三十一  
二  
苟蒙古中無通番作賊之人則守望相助緩急可恃何至任聽番帳北移肆行蹂躪臣仰承

聖訓先將漢奸巨盜麻木溝趙牙信等查拏淨盡察漢諾們罕亦皆驅逐過河河北大患已除此時各蒙古欣喜感戴紛紛向口外遷移惟查各旗蒙古帳房內藏匿漢奸事所不免日後又復教引仍非長久之計因分派營員逐戶搜查卽據搜出漢奸王閏月等六名已分別照例懲辦至拏獲蒙古賊犯問擬死罪者十九名遣徒者五名交旗鞭責管束者六十六名審明釋放三十二名俱已分別奏咨



擬結尙未審定者十三名現飭委員作速審辦惟  
各案未獲蒙古賊犯尙有三十餘名已嚴飭札薩  
克王公台吉等按名擒獻乃日久未據獲送臣等  
伏查該札薩克虐使屬下以致勾引野番渡河搶  
劫屢煩

天兵爲之驅勦現在河北肅清野番等尙知感懼獻出  
所搶婦女馬匹及藏匿裹脅之漢奸蒙古多人而  
各案審出蒙古賊犯屢飭該札薩克等細獻猶復  
意存袒護延宕不交是野番尙有悔罪之心而蒙  
古轉無向化之實且自

本朝定鼎以來野番不過狗偷鼠竊未敢明犯地界而  
蒙古羅卜藏丹津於雍正年間侵凌各部落兼并  
猖狂上煩

天討若不乘此時嚴加約束使之真知畏法則數年之  
後休養生息勢稍強盛偏弱偏強又難必其爲安  
靜臣等分飭將弁前往各旗將逸犯名字開單坐  
索責令擒獻現據丹木札等旗獻出賊犯曲古等  
七名餘俱呈遞限狀勒緝送交雖不能盡數成擒  
一無漏網而各屬下蒙古咸知一經作賊即可指  
名坐索擒拏庶足以生其畏懼之心至各該旗近

年以來因避野番搶劫紛紛避入內地其在口外者亦俱附近卡倫藉資倚庇現在野番掃數回巢蒙古自應各回牧界未便容留內地前已飭令沿邊營縣曉諭各蒙古遷移出口毋任逗遛其貧窮乞食者賞給炒麵俾資果腹仍俟天氣漸融酌賞行糧押送出口月餘以來節據肅州山丹張掖東樂永昌平番西寧大通永安文武官員將寄居內地蒙古查明戶口共一萬二千餘人業已陸續押送出口其貧窮無力者另冊稟報共四千三百餘人亦經散給口食行糧各歸牧地正在查辦間有

郡王車靈端多布等二十四旗札薩克前來西寧  
面見臣等口稱我等屬下被野番搶劫避入內地  
現得仰仗

天威斷絕口糧查拏漢奸業將野番盡行驅逐過河我  
們得以各安游牧又蒙念及貧窮蒙古賞給口食  
行糧恩施至重但是這些貧窮蒙古鍋帳牲畜俱  
未蒙賞行糧不過餬口十餘日此後仍難度命且  
住在口內之貧窮蒙古雖蒙賞賜口外似此者仍  
復不少我們各旗約畧計算共約有數萬人俱屬  
嗷嗷待哺我們愧無力量不能惠濟屬下只求轉

奏

大皇帝賞借銀數萬兩以爲賑恤之用仍在我們應領俸銀內分年扣還卽是恩典等語臣等以青海各旗蒙古自來未曾格外出力而亦從無賞借撫卹銀兩坐扣俸銀之例當卽面加駁斥惟該札薩克所稱口外蒙古貧難情形細加察訪均皆屬實若不量示撫綏則該貧窮蒙古數萬餘人悉成餓殍伏思作賊之蒙古法所必懲而被害之蒙古則情尤可憫惟

朝廷之恩威並用斯遠人之感懼交孚檢查嘉慶五

年舊案有前任西寧辦事大臣台布因蒙古被野番搶劫查有貧窮無力者六百餘戶奏蒙

聖恩動用甘省帑銀五萬兩西寧倉糧二千石分給貧窮蒙古爲產畜口食之資現在蒙古被搶既久貧窮愈甚人戶數目較嘉慶五年間不啻倍蓰臣等再四籌商若賞給銀兩不獨爲數不貲且蒙古王公等一聞賞給必先捏報戶口以有力爲無力

國恩旣不可倖邀經帑亦不可濫費查甘肅沿邊州縣倉貯青稞多者十餘萬石少亦數萬石每石例價不過五錢除出借籽種口糧外不能搭放兵糧

似此貯倉甚多日久霉變將來總歸於減價糶賣  
據<sub>臣</sub>等愚昧之見可否仰求

皇上天恩賞給貧窮蒙古青稞三萬石以爲賑卹之用  
如蒙

聖慈愈允<sub>臣</sub>等一面行文各旗札薩克王公台吉令將  
貧窮蒙古據實冊報委員復查發給賑票一面酌  
量沿邊附近州縣將倉貯青稞運至卡倫設廠放  
領運脚廠費及陸續散放炒麵均核實支銷所有  
貧窮蒙古大口酌給青稞一石小口酌給青稞五  
斗並派署西寧道屠之申及副叅大員卽在各卡

倫監放臣那彥成一俟河南番戶查清卽趕回省

城辦理奏銷秋審臣武隆阿至時親往稽查不致

遺濫倘有盈餘青稞仍歸倉存貯如此辦理則該

蒙古等旣可無虞枵腹且一家數口日食所餘亦

可向有力蒙古易換羊隻孳生繁息俾數萬窮黎

均沾

聖澤得以鼓腹含哺於

光天化日之下而亦不敢多糜

帑項致有擅冒請獎謹

奏



道光三年二月十二日奉

上諭那彥成等奏各旗蒙古全數出口仍嚴拏賊犯並請賞口糧以示懷柔一摺青海野番夥劫經那彥成等先將漢奸巨盜麻木溝趙牙信等查拏淨盡察漢諾們罕亦皆驅逐過河其蒙古賊犯除分別擬罪鞭責管束外尚有未獲各犯三十餘名著那彥成等分飭將弁前往各旗將逸犯名字開單坐索務令擒獻毋任一名漏網其丹木札等旗獻出賊犯曲古等七名著那彥成等照例辦理至郡王車靈端多布等二十四旗札薩克請借銀數萬兩以爲賑恤之用仍在

應領俸銀內分年扣還經那彥成等面加駁斥所辦甚是惟作賊之蒙古法所必懲被害之蒙古情尤可憫甘肅沿邊州縣倉貯青稞甚多每石例價不過五錢除出借籽種口糧外不能搭放兵糧將來總歸減價糶賣著將青稞三萬石賞給貧窮蒙古那彥成等卽行文各旗札薩克王公台吉等令將貧窮蒙古據實冊報委員復查發給賑票並酌量沿邊附近州縣將倉貯青稞運至卡倫設廠放領運脚廠費及陸續散放炒麵均著核實支銷其貧窮蒙古大口酌給青稞一石小口酌給青稞五斗著派道將大員卽在各

卡倫監放妥爲經理倘有盈餘青稞仍歸倉存貯事竣報部核銷可也

道光三年二月十七日會同西寧辦事大臣武公隆阿

奏爲拏獲夥搶牲畜蒙古賊犯審明議擬具奏事竊查青海各旗蒙古連年被搶固由循貴野番渡河行劫而蒙古中隨同作賊者亦復不少疊經臣等嚴飭沿邊文武實力查緝蒙古賊犯審辦其在逃各犯屢飭該管札薩克細獻乃日久不交復經臣等派委將弁前往各該旗按名坐索始據丹木凌

策楞等旗獻出賊犯四古 格爾麤完帳 羣丕

勒班第等三名並據各文武員弁拏獲他里必班

宗都尖木錯 圖爾圖卜等三名又什加布

洛爾甲父子二名當卽飭發委員道府等審訊茲

據審明錄供解勘前來 臣等親提訊問緣他里必

班卽納卷他里畢係索諾木旺濟勒旗下蒙古道

光元年正月間聽從蒙古達什加布爲首糾搶同

在逃之蒙古加拜並蘊依族不知名字番子一共

十三人各騎馬持械偕至木利古茨地方搶獲蒙

古駱駝一百一十隻二年四月內該犯又聽從葉

什羣族番子阿斗奇爲首糾搶同在逃之加木羊  
班第並不知旗分名字蒙古一共三十八人各騎  
馬持械偕至胡丹度地方搶得錫第公旗下牛三  
百六十餘頭馬四十餘匹羊四百餘隻並錫第公  
帳房內氈幃等物七月內他里必班又聽從加木  
羊班第爲首糾搶並剛咱灰不知名字番子一共  
十三人俱騎馬持械至東科爾寺地方搶劫蒙古  
牛一百餘頭馬二十餘匹羊五百餘隻經棉柳溝  
卡兵拏獲又另案拏獲之宗都尖木錯卽熊化格  
龔爾係旺舒克旗下蒙古格爾慶完帳卽完增丹

木却係多爾濟昂濟勒旗下蒙古曲古係丹木凌  
策楞旗下蒙古道光元年十月內宗都尖木錯與  
現獲之格爾龐完帳聽從噶里朶思族番子博濟  
巴密爲首糾搶一共五十餘人騎馬持械至烏蘭  
莫爾地方搶獲蒙古羊二千餘隻牛二百餘頭馬  
四十餘匹並衣服等物十二月二十二日宗都尖  
木錯又與現獲之曲古聽從博濟巴密爲首糾搶  
同蒙古官布並德爾格族不知名字番子一共八  
人各騎馬持械偕至烏蘭莫爾噠濟愛地方搶獲  
蒙古羊三百餘隻牛七十餘頭馬二匹格爾龐完

帳又於道光元年十月內聽從素識烏蘭族番子  
吉利爲首糾搶同剛咱族不知名字番子多人偕  
至烏蘭莫爾地方搶獲蒙古羊三百餘隻牛十五  
頭馬四匹經丹噶爾主簿拏獲宗都尖木錯審出  
曲古格爾羅完帳向該札薩克坐索擒獻又另案  
拏獲之羣丕勒班第係噶拉布納木楚克旗下蒙  
古道光二年二月內羣丕勒班第聽從蒙古完的  
朵兒黨爲首糾搶同番子雄渥策洛等一共五十  
餘人各騎馬持械偕至蘇里討賴地方搶獲蒙古  
羊二百餘隻牛一百五十餘頭經該札薩克擒獻

又另案擊獲之什加布卽策爾甲特與子洛爾甲  
係特禮貝勒旗下蒙古與察漢諾們罕屬下番子  
哆哩執識道光二年六月不記日期哆哩起意商  
允什加布洛爾甲父子二人及同族賊番瑚洛等  
一共四十餘人搶劫什加布父子各騎馬執械至  
瓊科地方見有尖巴哩貝勒旗下蒙古四十餘戶  
哆哩等卽放鳥鎗傷斃事主一人搶得馬二十餘  
匹駱駝一百餘隻羊三百餘隻牛五十餘頭七月  
內不記日期哆哩又約會什加布洛爾甲並前次  
同搶之夥賊及不知族分番子堪布卡善木等一



共六十餘人仍各騎馬持械至拉沙爾胡丹度莊  
一帶牧坡搶得羊一千餘隻馬二百餘匹騾二十  
餘頭事主追捕鎗斃番賊一名番賊拒捕亦鎗斃  
事主一人什加布洛爾甲等三十餘人同趕牲畜  
先走哆哩等帶領二十餘人復往毛伯勝一帶搶  
劫得馬牛一百有餘羊三百餘隻經恪卜恰地方  
卡兵盤獲又另案拏獲之圖爾圖卜係沙克都爾  
王旗下蒙古道光二年秋間不記月日圖爾圖卜  
被不知名字番賊捉去押令引路圖爾圖卜畏其  
兇惡隨將番賊引往巴燕俄卜一帶尋覓蒙古帳

房行至溝內乘空逃回該番賊等曾否搶獲何處  
牲畜伊並不知情經大通營兵盤獲以上各犯俱  
經先後獲案訊據供認前情不諱再四研詰並無  
另犯糾夥搶劫別案正在核奏間據西寧縣詳報  
洛爾甲在監病故照例驗訊實係因病身死並無  
別故應卽照例擬結查蒙古例載平人夥衆強劫  
什物殺人者不分首從均卽處斬梟首示衆又僅  
止隨從入夥並未加功殺人傷人者比照刑例未  
傷人夥盜情有可原免死發遣雲貴兩廣煙瘴地  
方充當苦差又道光二年八月刑部奏准嗣後蒙

古強劫未傷人之犯倘什物內有牲畜在十匹以上者卽照刑律二罪並發從其重者論照偷竊蒙古牲畜新例按其匹數分別首從擬以實緩通行在案又蒙古例載偷竊牲畜三十匹以上者不分首從絞監候等語此案他里必班聽從搶劫三次宗都尖木錯格爾巖完帳什加布洛爾甲聽從搶劫二次曲古羣丕勒班第聽從搶劫一次現訊該七犯俱未殺傷事主按蒙古強劫本例罪止發遣惟所搶牲畜計數均在三十匹以上自應遵照刑部奏定章程從重照偷竊牲畜例定擬什加布洛

爾甲父子同犯搶劫事屬侵損應仍以凡人首從  
論除洛爾甲病故不議外他里必班宗都尖木錯  
格爾羅完帳曲古羣丕勒班第什加布六犯合依  
偷竊牲畜三十匹以上不分首從絞監候例擬絞  
監候秋後處決該犯等罪名業經問擬絞候應無  
庸監候待質入於秋審辦理蒙古圖爾圖卜被捉  
引路中途逃回並未同行上盜應免置議各逸盜  
蒙古番子等嚴飭勒緝獲日另結將全案供招咨  
部謹

奏奉

硃批刑部議奏

道光三年二月十七日會同西寧辦事大臣武公  
隆阿

奏爲商民與蒙古貿易應請定立章程指明地界並  
請封閉邊外金廠以杜漢奸潛匿事竊查西寧涼  
州甘州肅州等處向有商民攜帶資財貨物前往  
蒙古游牧地方易買羊隻貨物名爲羊客其中土  
著甚少外來游民居多鮮有殷實之人均不久於  
其業歲有更換人數姓名並無一定其貿易地方  
從前止准在於西寧縣屬之日月山卡以內東科

爾寺一帶地方嗣於乾隆二十六年經前任西寧  
辦事大臣多爾濟以遠在口外之窮苦蒙古所牧  
牲畜道遠不能趕來售賣議將商民由西寧府詳  
請西寧辦事大臣衙門給以印票准其出口貿易  
經部議覆

奏准遵行該羊客執持印票卽攜帶貨物徑自出口  
在蒙古游牧買羊易貨之後分進口內售賣其由  
何處出口進口既不指定地方而去來遲速亦無  
一定期限其間藉票影射攜帶游民流爲漢奸並  
難保無夾帶違禁軍火器物且近年以來野番佔

踞蒙古地方該羊客卽同蒙古野番一體交易或  
導引野番搶劫或教誘蒙古爲匪竟成有票之漢  
奸爲害邊陲實非淺鮮此時若將羊客禁絕於內  
地原無妨礙第念蒙古以游牧爲業羊隻無人易  
買未免生計維艱若任該羊客等出入自由漫無  
稽查實爲邊隅之患其應如何立定章程明定地  
界之處當經臣等咨行西寧甘州涼州肅州提鎮  
道府州各就地方情形核議前來臣等細心籌酌  
應請嗣後毋論何州縣羊客與河北蒙古買羊易  
貨止准在於西寧縣屬日月山卡以內東科爾寺

丹噶爾及大通縣屬之烏什溝察漢俄博等處互相交易其河南蒙古番子羊隻貨物均在貴德廳屬之西河灘售賣該羊客不許徑赴蒙番游牧處所收買致滋流弊至甘涼肅州羊客買得羊隻千百成羣難以盡由內地行走准由野馬川沿邊一帶進入甘涼肅州各卡隘仍令各羊客將帶賣之綢緞布疋及不干例禁各物並沿途自食糧茶若千同行幾人是何姓名前往何處買羊易貨由何路行走買得羊隻後由何卡進入內地先行呈報西寧府轉詳西寧辦事大臣衙門逐一開載票內



買羊一千隻以上者給大票一張一千隻以下者  
給小票一張仍發西寧府交與羊客執持前往票  
載地方貿易大票限四個月小票限兩個月或回  
西寧甘州或回涼州肅州均於票內登明由西寧  
府知會各提鎮飭知守卡弁兵查驗羊隻貨物人  
數與票載相符卽將印票在卡收回截角隨時呈  
送該管提鎮按月呈報西寧辦事大臣衙門驗發  
西寧府查銷如所銷之票短少卽查明是何羊客  
未繳按票追究至於該羊客到卡時守卡弁兵查  
明羊隻貨物人數或有浮多或經由道路及所進

卡隘與票內互異者卽行稟究倘無印票卽照無票出口例辦理查有夾帶火藥鉛丸一切違禁器物更當從嚴究辦其蒙古羊隻每年定以四月至九月各就便前赴指定之東科爾寺丹噶爾烏什溝察漢俄博西河灘等處售賣各處羊客亦屆期請票前往仍由西寧辦事大臣衙門及西寧鎮道會商委員稽查彈壓交易事竣催令各散毋許日久逗遛以免滋事如此立定章程則蒙古既可按時前來指定處所買羊易貨不致有妨生計而內地商民毋許前赴蒙古游牧交易不能夾帶閒人

流爲漢奸至河南番族亦有出售羊隻並飭循貴  
兩廳於羊客貿易時亦照買蒙古羊隻給票之例  
辦理按季呈報西寧辦事大臣衙門以憑稽核此  
外尙有甘州之野牛溝肅州之赤金湖等處素產  
金砂爲漢奸盤踞之所以挖金砂爲名乘隙搶劫  
先經臣等檄飭該管文武將野牛溝赤金湖地方  
嚴行封禁並將偷挖金砂之漢奸按名拏究現在  
該二處並無奸民潛匿惟查此等匪徒散漫無依  
難保不三五成羣潛赴大通縣屬之扎馬圖官金  
廠偷挖金砂且恐扎馬圖官廠人夫藉端影射復

至野牛溝一帶偷挖日久聚衆滋事又成巨案伏查扎馬圖官金廠地處邊外自乾隆三十九年招商開採以來迄今四十餘載歷年久遠金砂日形短絀每年止納正撒課金二十八兩九錢零爲數甚微殊於

國課無甚裨益而藏匿奸宄爲害甚大權衡輕重自應一體封禁相應請

旨將扎馬圖金廠嚴行封閉俾沿邊一帶地方不使育一漢奸潛踪溷跡庶邊界可期肅清永臻綏靖謹奏

道光三年三月初一日奉

上諭那彥成奏請定商民與蒙古貿易章程並封閉邊外金廠一摺西寧涼州等處向來商民攜帶貨物由西寧辦事大臣衙門給票出口徑赴蒙古游牧貿易既不指定地方去來亦無期限以致漢奸混雜並夾帶違禁器物於邊陲大有關係惟念蒙古以游牧爲業若將羊客禁絕誠恐生計日艱如漫無稽察又復諸獎叢生該督等請嚴立章程明定地界自應如此核實辦理嗣後毋論何州縣羊客與河北蒙古及河南蒙古番子交易卽以現定地界爲限不許徑赴蒙

番游牧處所收買至甘涼肅州羊客往山野馬川沿邊一帶行走先行報明西寧辦事大臣衙門分別發給大票小票逐一註明嚴定期限由西寧府知會各提鎮飭知守卡弁兵據實查驗毋許浮冒其蒙古羊隻每年定以四月至九月按照指定處所售賣事竣不准逗遛以杜弊端至河南番族出售羊隻並飭循貴兩廳於貿易時照給票之例辦理此外甘州之野牛溝肅州之赤金湖等處向有漢奸偷挖金沙現經該督等嚴拏查禁惟大通縣屬之扎馬圖官金廠該匪徒等難保不乘間潛往開採著卽嚴行封閉所有

應納正撒課金二十八兩零卽停其交納此項人夫糾聚已久該督等務須妥爲安插毋致流而爲匪倘經理不善仍有匪徒溷跡偷挖致生事端惟該督等是問

道光三年二月十七日會同西寧辦事大臣武公隆阿

奏爲每年進京堪布喇嘛並玉樹德爾格等番族進京出口嚴查攜帶漢奸以靖邊圉事竊查西藏班禪額爾德尼及達賴喇嘛年年均遣堪布入都進貢呈遞丹舒克其商人等所帶貨物人數本有定

額嗣因日久內地商民有自西藏隨同進口者亦有由西寧縣屬之丹噶爾隨同出口者該商民等特與喇嘛同行出入可以漏稅於是無賴奸徒混出口外及夾帶違禁器物售賣漁利並有與蒙古番子勾結滋事之弊查堪布等來往均由蒙番牧境行走內地民人本不准私行出入且現當懲辦漢奸驅逐番帳之後尤未便任聽濶跡邊外致起釁端應請嗣後該堪布等於每年進京時由駐藏大臣飭將正餘各包及買賣貨物照例送冊驗行仍將同行喇嘛及跟役並商上人等姓名年貌籍



一查明造冊先期咨會陝甘總督及西寧辦事大臣衙門俟該堪布等到丹噶爾時該處主簿具報總督及西寧辦事大臣會同委員按冊逐名查點如人數年貌姓名俱各相符方准進口交與官歇家招留其回藏之日亦由陝甘總督西寧辦事大臣飭令該堪布造具人數清冊於其出口時委員照冊查點不許逗遛一人多帶一人該堪布於到藏時再由駐藏大臣照冊查點如有漢奸朦混隨行卽照無票出口之例辦理至玉樹德爾格等番族係在西寧府之西南且通四川該番族前來貿

易向由日月山卡進口來至丹噶爾地方將貨物  
交與該處官歇家經手售賣人數既多閱時又久  
與內地民人甚爲熟習漢回蒙番襍處更易滋弊  
嗣後該番族等到口之時亦由丹噶爾主簿報明  
總督與西寧辦事大臣委員會同營弁帶領該處  
官歇家前往卡外將人數查明方許進口仍令該  
歇家出具並無攜帶漢人切實甘結由該主簿造  
具花名清冊連結通報查核俟番族貿易事竣出  
口時仍委員前往卡汛照冊查點明白方准放行  
倘此內查有漢回奸民或有違禁器物朦混夾帶

出口者除本犯嚴辦外並將該歇家等一體治罪  
此時嚴行盤查總不使有漢奸一人潛行出入邊  
隅要地得免勾結可期永臻綏靖謹

奏

道光三年三月初一日奉

上諭那彥成等奏堪布喇嘛並玉樹德爾格等番族進  
口出口嚴查攜帶漢奸一摺西藏班禪額爾德尼及  
達賴喇嘛每年遣使堪布入都進貢呈遞丹舒克其  
商上人等所帶貨物人數本有定額近來奸徒夾帶  
並有蒙古番子勾結滋事之弊現當懲辦漢奸驅逐

番帳自不容聽其湊跡嗣後堪布等進京由駐藏大  
臣飭將正餘各包及貨物照例造冊仍將同行喇嘛  
及跟役並商人等先期咨會陝甘總督及西寧辦  
事大臣俟到丹噶爾時該主簿具報該督等會同委  
員按冊查點方准進口回藏時亦飭令造冊查點出  
口不許逗遛夾帶該堪布到藏由駐藏大臣照冊查  
點如有漢奸朦混卽照無票出口例辦理該督等接  
奉此旨卽咨明駐藏大臣一體遵照其玉樹德爾格  
等番族貿易將貨物交官歇家售賣更易滋弊該督  
等奏請嗣後番族到口由丹噶爾主簿報明委員會

同營弁帶領歇家查明人數方准進口仍令出具甘結其出口時委員查點如有放行奸民夾帶除嚴懲本犯外歇家等一體治罪俱著照所議行

道光三年二月十七日會同西寧辦事大臣武公隆阿

奏查察漢諾們罕旗下蒙古及循貴野番均於歲內掃數渡河回巢經臣等奏派西寧鎮總兵穆蘭岱督同文武委員親往循貴各渡口清釐查辦毋稍草率粉飾茲據該鎮等稟稱率同委員分駐河干查明渡河蒙番共一萬八千一百九十餘名並遵

照奏定章程分立千戶百戶百總十總該番等經  
此次拏禁內線斷絕糧茶鼠竄同巢實屬誠心畏  
懼情願納獻貢馬看守渡口極爲安靜懾服現已  
查辦將次完竣惟俟戶口冊籍造齊卽帶領各旗  
千百戶前來西寧謁見等語俟該鎮回郡酌定貢  
馬數目並把守渡口章程另行奏報謹

奏奉

硃批知道了

道光三年二月十七日會同西寧辦事大臣武公

隆阿

奏臣辦理番案劄調喇嘛前往各番族徧行曉諭令其迅速回巢該喇嘛等冒雪衝寒傳諭野番俱已掃數南歸嗣該喇嘛等又隨同總兵穆蘭岱等清查各族戶口化導衆番又公同保舉千戶百戶等番目於編查保甲事宜甚爲出力合無仰懇

皇上天恩將喇嘛乙希多爾濟賞給札薩克喇嘛札莫洛碩根敦什加布賞給達喇嘛官木却合加木錯只格麥隆什托加木錯賞給蘇拉喇嘛以示鼓勵則該喇嘛等益知感激圖報以後管束衆番誠心勸善於邊務亦有裨益謹

奏

道光三年三月十二日奉

上諭那彥成等奏辦理番案出力之喇嘛等懇恩量加鼓勵等語著加恩將乙希多爾濟賞給札薩克喇嘛職銜札莫洛碩根敦什加布俱賞給達喇嘛職銜官木却合加木錯只格麥隆什托加木錯俱賞給蘇拉喇嘛職銜以示鼓勵

道光三年三月二十七日會同西寧辦事大臣武公隆阿

奏爲編查番族戶口完竣青海各旗蒙古俱已復業



邊境又安番案告藏事竊查循化貴德野番佔踞  
河北察漢諾們罕旗下蒙番從而窩賊分贓臣等  
仰承

聖明指示斷絕糧茶以制其生命嚴拏漢奸以杜其教  
誘該諾們罕及野番窮蹙畏懼於上年十二月間  
掃數渡河回巢歷將河北肅清實在情形奏蒙

聖鑒並聲明飭委西寧鎮總兵穆蘭岱督飭循貴文武  
委員編查保甲分立千戶等番目各歸管轄在案  
茲該鎮於二月二十日回至西寧據查新從河北  
回巢察漢諾們罕屬下蒙番及循貴野番兵二千

三百三十二戶男女一萬八千一百九十八名口  
遵照奏定章程將察漢諾們罕旗下蒙番查造門  
牌分立千戶百戶百總什總責令該旗圖薩拉克  
齊等官遞相管束至循貴各族野番共編立千戶  
十名百戶四十名百總八十六名什總四百名並  
據該鎮將循貴野番千戶百戶百總什總等帶至  
西寧謁見臣等宣揚

皇上德威諭令管束各番代爲請票易買糧茶毋許番  
衆一人過河爲匪作賊倘有不遵約束者該千戶  
等卽不准代爲請票仍綁送循貴廳營究辦如有

扶同祖獲查出同罪該千戶等叩頭祇遵至該野  
番等嚮化情殷情願進獻貢馬循化各野番公議  
請獻十五匹貴德各野番請獻十一匹業經該番  
等揀選驍壯馬二十六匹親身送至西寧呈交當  
飭西寧鎮總兵在於馬廠牧放備撥嗣後自道光  
四年起仍照玉樹番子之例每匹折價銀八兩於  
春季在循貴西廳衙門交納歲以爲常並將貢馬  
及領糧買糧章程詳細議定飭屬遵行毋許書役  
欺家人等從中勒掇刁詐以杜流弊以期永久伏  
惟

皇上撫綏外夷

恩施至渥原無需此朶朶貢馬惟該番芹曝微忱不容  
自己且常令謁見官長自知爲貢馬番民旣可示  
以羈縻亦可漸馴桀驁又循貴黃河渡口共二十  
處其與察漢諾們罕牧地相近者卽交該旗圖薩  
拉克齊等官督同把守其與野番各族牧地相近  
者卽令該族千百戶等分別把守但有偷渡河北  
之人卽令擒獻倘恃強倚衆該圖薩拉克齊等不  
能制伏卽將偷渡戶口人數飛報廳營轉稟總督  
及西寧辦事大臣立卽派兵驅剿設匿不舉報經

西寧鎮道春秋兩季輪往查出將把守渡口之頭  
目革退治罪臣等業經傳齊番目明白曉諭該番  
目等僉稱情願爲

大皇帝出力看守渡口使我們各旗族蒙番永爲

聖世良民感激

天恩實無旣極等語伏查循貴野番佔踞河北與察漢  
諾們罕私相勾結搶劫蒙古擾及邊疆計其肆意  
鴟張已歷數年之久今臣等稟承

聖訓仰仗

天威於半載之內不勞兵力得以迅速肅功蠢爾番族

知爲安靜守法之人方可易買糧茶幸全軀命斷不敢再行盜劫自外生成所有善後各事臣等均經陸續具

奏奉

旨允行在案嗣後惟當督率所屬文武將奏定章程實力奉行但能行之以實則番族有所畏懼不復鴟張邊陲自臻靜謐事事皆有實據斷不敢以空言塞責上負

聖恩至河北各旗蒙古因懼野番搶劫紛紛避入內地自上年十月以後野番窮蹙畏懼漢奸查拏淨盡

口內口外各旗蒙古均無被搶之案該蒙古等親  
見河北實已肅清俱於本年正月間全數出口各  
安游牧其貧窮無力者<sub>臣</sub>等業經奏請賑卹該蒙  
古等從此休養生息二三年後即可漸復元氣此  
皆仰賴

聖主逾格鴻慈使河北二十四旗蒙古由水火而登之  
衽席<sub>臣</sub>等及在事文武均不勝欣幸感佩之至謹  
奏

道光三年三月二十五日奉

上諭那彥成等奏編查番族戶口完竣青海各旗蒙古

俱已復業一摺循化貴德佔踞河北已歷數年此次督飭文武員弁嚴禁糧茶搜拏漢奸不煩兵力致野番畏懼全數移居河南辦理甚屬妥速那彥成著交部議敘

道光三年三月二十七日會同西寧辦事大臣武公隆阿

奏爲酌擬賞給野番各族千戶百戶百總並防河蒙番青稞以示獎勵而專責成事竊查循化貴德野番分族而居素無統束是以紛紛偷渡河北散漫無稽現經臣等逐細編查戶口分立千戶百戶百



總什總遞相管轄各族番子易買糧茶總由千百戶等代爲請票遇有爲匪不法之人該千百戶等卽不准代爲請票並責令擒獻究辦原以野番插帳邊外居無定所兼之言語不通若全任廳營稽查約束恐難周徧不得不以番治番惟野番以游牧爲生旣寄千百戶等以鈐束衆番之任則千百戶等卽應時時查察未免於牧務有妨且管理不善自當斥革究辦示之以罰若管理妥協不示之以賞則該千百戶無所希冀日久必致懈弛伏查青海蒙古札薩克王公台吉每年

恩賞俸銀九千餘兩之多亦因其管轄蒙古

特加優賚茲循化貴德野番千百戶等管束番衆復獻  
貢馬察其情詞肫懇較之各旗札薩克尤爲誠服  
若稍加鼓勵必可得力臣等公同酌議所有該番  
目等如果能約束番衆千戶一名每年賞給青稞  
十二石百戶一名賞給青稞八石百總一名賞給  
青稞四石其什總人數過多所管又僅止十戶應  
請毋庸賞給又循貴黃河渡口二十處亦責令察  
漢諾們罕旗下圖薩拉克齊等及野番千百戶等  
把守查青海蒙古各旗所屬官員原無賞給口糧

之例惟該圖薩拉克齊等旣膺防河重任亦當分別賞罰以示勸懲卽野番千百戶等把守渡口較之僅管番衆尙不免辛勤賠累臣現在察看各渡口情形分爲最要次要又次要三等該圖薩拉克齊及野番千百戶等認真把守如果一年無偷渡之人所有最要渡口每年酌賞青稞二十石次要渡口酌賞青稞十五石又次要渡口酌賞青稞十石設防守懈怠以致有人偷渡又匿不舉報一經查出由何渡口偷渡卽將把守之圖薩拉克齊及千百戶等斥革嚴辦計賞給野番千百戶百總

及防守渡口之圖薩拉克齊等每歲通共動用青  
稞一千零二十石每石例價五錢合之

帑項不過五百兩零而野番千百戶及防河之圖薩  
拉克齊等必皆鼓舞奮興認真効力以冀仰邀

恩賞數年之後稍著成效則河北巡防會哨經費即可  
以次裁減於撫馭機宜既有裨益而亦不致糜費  
帑金謹

奏

道光三年三月十二日奉

上諭那彥成等奏請賞給野番各族千百戶百總並

防河蒙番青稞一摺循化貴德野番向係分族而居  
本無統束故易於偷渡河北散漫無稽現據那彥成  
等編查戶口分立千戶百戶百總令其遞相管轄稽  
察各族番之易買糧茶由該千百戶等代爲請票過  
有爲匪不法者責令擒獻究辦茲該督等奏稱野番  
之千百戶等現在均知管束番衆復獻貢馬察其情  
詞肫懇洵爲懾服歸誠自當量予恩施所有該番目  
等果能始終不懈著每年千戶一名賞給青稞十二  
石百戶一名賞給青稞八石百總一名賞給青稞四  
石至循貴黃河渡口二十處責令察漢諾們罕旗下

圖薩拉克齊等及野番千百戶等把守亦當分別賞  
罰以示勸懲最要渡口如果一年無偷渡之人每年  
賞給青稞二十石次要渡口賞給青稞十五石又次  
要渡口賞給青稞十石倘防守疎懈致有偷渡又匿  
不舉報者查出由何渡口偷渡卽將把守之圖薩拉  
克齊及千百戶等斥革嚴辦該野番千百戶及防河  
圖薩拉克齊等經此次特加優賚生計有資當知感  
知畏認真効力方得長邀恩賞也稟之

道光三年三月二十七日會同西寧辦事大臣武

公隆阿

奏此次辦理番案在事文武各員弁分投深入草地  
驅逐羣番南渡及駐劄河干點驗戶口編設門牌  
自上年九月迄今半載以來自備口糧鍋帳口外  
嚴寒風雪倍嘗辛苦而沿邊州縣營汛先後擊獲  
漢奸及蒙古賊匪三百餘名承審各員悉心研訊  
分別奏咨詳辦晝夜辛勤俱能不辭勞瘁現在全  
案完竣邊境肅清該員弁等認真出力各著微勞  
在臣固不敢壅於

上聞惟究係本省地方不敢遽行保

奏惟刑部郎中鄒錫淳江蘇舉人年三十九歲於上

年三月經文孚等隨帶陝西審辦案件八月內復經臣等奏明隨帶西寧辦理番案該員人甚體面心思精細晝夜研訊犯供經理文案最爲出力奏准留辦善後事宜今番案全行完竣應令回京供職臣前在刑部尙書任內深知該員守潔才優洵屬可信曾隨

欽差大臣文孚帥承瀛那清安王鼎辛從益等出差河南山東直隸陝甘等省查辦事件嘉慶二十一年記名軍機章京於二十五年十月經刑部堂官奏請部奉



旨刑部奏留熟諳部務司員郎中鄒錫淳著傳其傳補  
軍機章京欽此是其才具差使爲刑部堂官所素知  
該員在部供職充當律例館提調總辦秋審本年  
四月卽屆郎中俸滿例得以繁缺知府保送引  
見今出差已屆一年之久而隨同辦理番案又著勤勞  
可否照

京察一等人員先由吏部帶領引

見以道府簡用之處出自

皇上天恩再臣又隨帶方畧館供事張玉裁禮部則例  
館供事陳翰繕寫稿案清理卷宗頗屬辛勤該供

事等均係由本館議敘以從九品歸部銓選之員  
今隨同辦理番案出力未便沒其微勞應請量加  
鼓勵以縣丞卽行選用謹

奏

道光三年三月二十五日奉

上諭刑部郎中鄒錫淳隨同辦理番案甚爲出力著回  
京供職候旨簡用供事張玉裁陳翰俱著以本班儘  
先選用

道光三年九月十四日會同西寧辦事大臣穆公  
蘭岱

奏爲籌議河北各族蒙古添設盟長等職以資整理  
事竊查甘涼肅三府州東西延袤六七千里自南  
山至黃河南北亦三四千里不等南山之外係熟  
番種地納糧熟番之外則各旗蒙古沿黃河小岸  
插帳住牧重門保障舊制誠爲盡善盡美嗣緣蒙  
古被野番搶劫至今衰弱已極因有漢奸勾結搶  
及馬廠漸壞藩籬延擾邊境而議者但謂番子搶  
奪蒙古不過外藩相仇何必爲蒙古捍衛殊不思  
藩籬不固猶人家墻垣傾圯不加修整卽有盜賊  
入室之虞臣那彥成再四思維必須設法令蒙古

振作自強固外藩卽靖邊徼而蒙古之氣餒勢散  
總由人心不齊漫無約束不知互相守助之義人  
自爲謀心愈散而勢愈孤而究之自顧者轉不能  
自全日前在貴德與臣穆蘭岱熟商及此意見相  
同連日臣那彥成過河至蒙古境內接見二十四  
旗蒙古王公咸知感激

天恩爲其安兵設卡防河十分歡感出於至誠因乘機  
向其詢問現在黃河水大野番未能偷渡將來河  
冰結凍處處如履平地可能保番子不來轉瞬卽  
交冬令爾等各旗作何計較守禦目前仰仗

大皇帝恩威不惜帑金安兵設卡爲汝等守禦故得現在無虞但事豈可永久施行且

大皇帝恩施如此之厚汝等仍前委靡不自計議坐享太平試問汝等於心何安該王公等曠若發蒙一時之喜又變爲愁查西北沿邊蒙古皆有盟長惟青海蒙古向未設有管事盟長人等以致散漫無束遇事各自畏避當卽層層曉諭代爲籌議章程將該二十四旗分爲左右兩翼每翼設盟長副盟長各一名每六旗設霍碩札奇噶克齊一名每三旗設梅楞一名每旗設札蘭一名承辦巡防一切

事件按各旗遠近大小人數多寡每旗止出二十五人仍分勻每一班止出五人一季一換隨同官兵巡防人數既不爲多又兼分班口糧馬匹亦皆減省隨同官兵巡防且得習練武備若有番賊渡河該蒙古能於幫同搶殺則野番從此不敢輕視日久壯志可鼓此後生計漸裕人數再增不至苦累或由此奮發則蒙古之勢不期然而自強及至數年之後著有成效再行察看情形

奏請將換防官兵裁撤亦正可節此糜費臣等商定卽諭知各旗王公等照此派設以期振作捍衛反

復開諭均各欣然樂從所有一切應辦章程由臣  
穆蘭忒將各旗王公就近傳集議定籌辦臣等愚  
淺之見商計如此但可否辦理之處仍求

皇上聖明指示再行檄飭各蒙古遵行謹

奏奉

硃批理藩院核議具奏

道光三年十月十七日奉

上諭理藩院奏核議那彥成等籌擬添設青海正副盟  
長等官並設立巡防蒙古官兵各章程一摺青海蒙  
古不自固藩籬經朕加恩敕令陝甘總督安兵設卡

妥爲防禦惟該蒙古等散漫無束遇事輒多畏避自應添設盟長等官俾資捍衛著照所議將河北二十四旗分爲左右兩翼每翼添設正副盟長一員每六旗設札奇噶克齊一員每三旗設梅楞一員每旗設札蘭一名承辦巡防事件按各旗遠近大小人數多寡每旗止出二十五人分勻以五人爲一班每季更換防同官兵巡防習練武備數年後若有成效將換防官兵奏請裁撤餘依議

道光三年九月十四日

奏爲查看黃河南北蒙番並撒拉爾回衆均極安謐



情形事竊臣前將閱畢河州鎮營伍前赴循貴一帶查看撒拉爾並稽查野番蒙古及河南北安設各路兵丁緣由恭摺

奏明在案臣卽於八月二十三日自河州起身輕騎減從由河州之起台保安循化各工回莊繞道親查據撒拉爾回衆老幼男婦出莊跪接咸稱伊等生長邊地不能仰瞻

大皇帝天顏今聞總督前來查閱卽如

欽差大人到此窮荒不勝瞻切歡仰之至臣當用好言勸諭務各安分守業共享

昇平之福卽據各工頭人聲稱從前愚回無知不免違  
法滋事自經乾隆四十六年大兵勦辦之後各工  
回衆方知天兵又多又勇數十年來仍懷畏懼况  
經本州本廳官員時常教化感戴

皇上生成各保身家各衛門戶永無梗化之心亦無械  
鬪之事臣查回民人心最齊近年撒拉爾回莊彼  
此因戶婚田土起釁常有械鬪之案今各頭人聲  
稱並無械鬪以見其安靜而各回民人心漸生不  
齊彼此鈐制亦未始不於邊徼有益也臣隨將各  
頭人量加獎賞仍嚴飭地方文武各員勤爲教勸

稽查俾令益臻安靜至循化貴德上年驅回各族  
野番聯絡插帳俱照章程分族設立千戶百戶百  
總什總逐層鈴束各將門牌懸於帳房之外以爲  
榮幸查對亦俱相符據各千戶等僉稱我們番子  
向來散漫無稽其中良莠不等從前偷過河北致  
犯地界自上年冬間被大人斷絕糧茶驅回河南  
編查戶口又定易換糧茶告條按口授食如有一  
人偷渡搶劫就禁一族糧茶雖白佛僧屬下素行  
强悍也遵號令搬回舊巢我們自搬回河南以來  
並無一名番子偷過河北亦無藏匿漢奸如今大

人親來稽查嚴切曉諭我們以後再不敢聽信漢  
奸引誘過河搶竊並據各番男婦老幼環繞臣馬  
前懇爲摩頂受戒臣告知我非喇嘛汝等惟當永  
守

朝廷法度不許再行渡河何必求爲摩頂而野番等又  
稱總督是

朝廷大員番子如同羊犬不能仰瞻

天顏今得大人親來卽是

欽差我們尊敬比敬重喇嘛更甚親熱依戀之意不當  
赤子遂逐一撫摩其頂加之賞賚俱各歡欣鼓舞

而去臣又於九月初三日行至河北所有河北二十四旗蒙古王公前來迎接而各蒙古一聞臣遠來撫綏扶老攜幼跟隨該王公台吉均來接見聲稱自被野番渡河搶劫佔住牧地我們流離失所年年窮不聊生上年先蒙

大皇帝動用官兵勦殺番賊之後又蒙

欽派大人前來將野番禁絕糧茶盡數驅逐回去自正月至今河北實無一個野番亦無漢奸又將我們窮蒙古招徠舊地更蒙

大皇帝厚賜十餘萬糧賑卹我們將食用餘糧換得牛

羊牧放孳生賴以餬口此時窮蒙古各安生業妻  
子牛羊均得遂生實皆

高厚天恩惟有感激叩首

臣

隨至各該王公游牧處所

查所編牌甲亦甚整齊牧畜出壯光景似有起色  
卽諄諭各蒙古王公等總宜努力自強更須憐卹  
屬下則野番無隙可乘屬下亦不致假裝番賊自  
相搶竊其窮苦蒙民

臣

酌予炒麵銀錢均皆望

闕免冠叩謝

天恩並據二十四旗王公遞具公呈乞爲轉奏理合譯

漢並原呈恭呈

御覽所有河北自西寧至甘州添設卡倫並察漢鄂博等處新設換防官兵臣逐處查察各該將備均係親督弁兵認真會哨巡防既無野番渡河漢奸亦皆絕跡沿途田禾豐收蒙古地方水草亦極茂盛經臣體察現在蒙番仰賴

皇上威福似將綏靖可以仰慰

聖懷謹

奏奉

硃批蒙番回衆果能長此畏威懷德邊徼無事則是長齡同卿莫大之功也嗣後仍當隨時留意相機料理

以期永靖邊陲慎勉而行所奏知道了

道光三年九月十四日

奏臣上年查辦番案剴調喇嘛乙希多爾濟等前往  
各番族諭令迅速回巢因該喇嘛等著有微勞奏  
蒙

聖恩分別賞給札薩克喇嘛各名號其時有間散喇嘛  
羅布藏原同乙希多爾濟等冒雪衝寒奔馳出力  
惟值番案完竣之際該喇嘛患病未曾來見以致  
將其遺漏今該喇嘛已經病愈仍照舊遇事出力  
不辭勞苦臣未敢壅於



上聞致令一人向隅合無仰懇

皇上鴻施將閒散喇嘛羅布藏賞給達喇嘛職銜以示

鼓勵謹

奏

道光三年十月初五日奉

上諭那彥成奏上年查辦番案出力之喇嘛懇賞名號  
等語蘇拉喇嘛羅布藏著加恩賞給達喇嘛職銜以  
示鼓勵

道光三年九月十七日會同西寧辦事大臣穆公  
蘭岱

奏爲察漢諾們罕屬下蒙古偷渡河北當卽拏獲會同察明嚴辦以示懲儆事竊臣那彥成夏間赴寧夏固原閱兵爲期兩月風聞回巢野番以爲總督與西寧辦事大臣均已換人欣然蠢動又欲過河當卽委員查緝並知會臣穆蘭忒就近督屬嚴行查拏臣亦由河州前來旋據巡河官兵稟報拏獲偷渡河北牧放牲畜之蒙古角爾克圖格隆等六名又有偷渡自首之蒙古官木却合等二名等情當經臣那彥成穆蘭忒均至貴德會審此案並面商一切事宜一面檄飭西寧府知府巴彥珠解犯

到彼隨同審訊

臣

等於八月二十八日均抵貴德

廳城除尖本一犯在監病故外隨提角爾克圖格  
隆等到案督率知府巴彥珠逐一研審緣角爾克  
圖格隆加乜黑班第尖木都拉桑布達克官木却  
合策末俱係察漢諾們罕旗下蒙古於上年十二  
月內被逐回巢因河南水草不好本年八月初八  
九等日各自繫筏將牛羊偷渡河北在頭代地方  
游牧其達勒吉一犯本係河北特禮貝勒旗下蒙  
古因向蒙古阿噶索討所借黃牛一隻銀八兩同  
至河南素與角爾克圖格隆相識被邀幫牧牲畜

該犯等過河甫經三日官木却合策末二犯卽自  
畏懼赴渡口巡哨官處投首又經防河官兵將角  
爾克圖格隆等六犯拏獲稟報臣等提齊嚴鞫據  
供前情不諱詰無搶劫情事查察漢諾們罕所屬  
蒙番久踞河北蒙古地方肆行搶劫罪本應死仰  
沐

皇上法外施仁遂令各回舊穴自應感戴

天恩永遠遵守乃未及一年該蒙古角爾克圖格隆等  
膽敢偷過河北藐玩已極必須殺一警百免致野  
番效尤若僅以問擬軍罪實不足以示懲戒且先

據察漢諾們罕迎接臣等聲稱伊屬不聽約束今  
破擊獲乞卽立正典刑以後伊亦得仰仗

天威駕馭屬下臣等審明後卽將該犯角爾克圖格隆  
加乜黑班第都拉桑布達克四犯一併正法仍梟  
首河干用彰炯戒尖本業已監斃應毋庸議官本  
却合策末二犯私行過河旋即畏法自首雖得免  
罪亦應酌加薄懲當將該二犯割耳押赴沿河示  
衆達勒吉一犯因前往河南索欠因至河北與偷  
渡者不同卽重責四十板飭交原旗收領管束所  
有失察偷渡之該管千戶等並看守渡口之番子

查明責革至察漢諾們罕不能禁管所屬過河本  
應

奏請議處惟該諾們罕實因年輕伊屬不甚畏懼且  
知懇求查辦偷渡之犯並不敢稍存護庇應請從  
寬免議再查察漢諾們罕所屬蒙番人戶本多現  
在所設千百戶總尙不齊全殊形渙散無稽臣等  
相商臣穆蘭伏在貴德暫住數日查明辦理務使  
嚴整守法並嚴諭該諾們罕卽速遵辦勤慎教管  
所屬毋任再行渡河自貽伊戚謹

奏奉

殊批知道了

道光四年九月十五日

奏爲酌增青海酬賞銀兩以資辦公恭摺奏

聞事竊准西寧辦事大臣穆蘭岱咨稱青海衙門每歲額設酬賞銀一千兩除每年查旗會盟筵宴以及照例酬賞各王公台吉暨各寺院喇嘛之外尙有護送西藏

貢使兵丁口食差派司員查辦番旗事件額賞已屬不敷兼之上年驅逐野番回巢以後

奏定章程每年考核循貴各族千百戶總功過並不

時差派番地緝拏賊匪及督催查辦一切事宜需費數倍於昔現在措辦維難惟有懇請借支明歲養廉銀一千兩以備賞恤臣查西寧辦事大臣衙門專管蒙番事務額設養廉銀一千兩酬賞銀一千兩定制已久原未便遇事加增惟是上年辦理番案以來一切新設章程較爲繁要其每年撫輯蒙番已須厚賞而巡查兵役以及緝拏賊犯尤需鼓勵非賞不行現在額設之項旣屬不敷而支用養廉亦非經久之道自應量爲增益俾資辦公當與藩司楊健悉心籌議查得司庫存貯款內現有



各屬舊草變價銀二萬六千餘兩係從前

奏明留備偶遇歉年撥補之項現在收貯無項動用  
應請在於此款內提出銀二萬兩發交西寧府就  
近發商生息按年一分每歲可得息銀二千兩以  
一千兩解交司庫計二十年即可歸還原款以一  
千兩解交西寧道庫供支青海不敷酬賞之需仍  
由青海衙門歸於酬賞案內按年造冊咨部核銷  
如此辦理既可不再糜經費而於籌辦蒙番事件亦  
得裕如謹

奏

道光四年十月初四日奉

上諭那彥成奏酌增青海酬賞銀兩一摺西寧辦事大臣衙門額設酬賞銀一千兩現據該督查明每年辦理蒙古番子事務及巡查兵役並緝拏賊匪均須厚賞鼓勵需費數倍於昔額設之項實屬不敷該管大臣因措辦維艱支用費廉殊非經久之道自應量爲增益俾資辦公著照所請於司庫存貯各屬舊草變價款內提出銀二萬兩發交西寧府就近發商生息按年一分可得息銀二千兩以一千兩解繳司庫統限二十年歸還原款以一千兩解交西寧道庫供支

青海酌賞之需仍留青海衙門歸於酬賞案內造冊咨部覈銷該部知道

道光四年十月十五日會同西寧辦事大臣穆公蘭岱

奏爲酌派總兵大員帶兵前赴番地會哨並照舊派兵防河緣由恭摺具奏事竊查野番盤踞河北臣那彥成仰荷

皇上隨時指授機宜悉數驅逐回巢近來尙知畏法聞有偷渡者亦俱隨時拏獲從嚴

奏明懲辦邊界洵屬肅清茲臣那彥成前來西寧補

閱鎮標營伍與臣穆蘭岱講求番務必須時加防  
範嚴密稽查庶杜奸萌而靖偷渡查黃河迤南地  
方山高土瘠人稠地狹又兼本年夏秋雨少水草  
乾枯而河北蒙古游牧地方水草茂盛難保不群  
涎覬覦况現值冰橋結凍之際沿河七百餘里處  
處坦途尤易偷渡雖設有防河之千百戶等若無  
官兵巡緝仍恐不能周密臣等熟籌妥商除仍照  
去年冬間防河章程派撥西寧河州二鎮屬兵丁  
四百名選派將弁數員分布河干駐劄防範外查  
去年冬間曾派西寧鎮總兵榮玉材帶兵前往巡

察印拏獲偷渡搶案要犯多名追出賊畜數千已  
有成效惟循貴野番原係西寧河州二鎮所屬茲  
擬於今冬派令該二鎮各帶弁兵百名親赴番地  
抽查保甲遊巡渡口輪流前往至冰橋融化之後  
再行撤回使野番知有大員不時會哨巡查不敢  
復萌偷渡之念而防河之千百戶等亦不敢稍有  
疎懈似於控制邊防較爲有益至該二鎮此次會  
哨所帶官兵口食馱腳等費臣等自行捐辦不請  
開銷謹

奏奉

硃批辦理甚屬周密另有諭旨

道光四年十一月初二日奉

上諭那彥成等奏酌派總兵巡哨番地並派兵防河一摺河北蒙古游牧地方水草茂盛現值冰橋凍結之時野番尤易偷渡雖設有防河千百戶等仍須官兵巡緝據該督等奏除照上年防河章程派撥西寧河州二鎮屬兵丁四百名選派將弁數員分布河干防範外並酌派西寧河州二鎮各帶弁兵百名親赴番地抽查保甲遊巡渡口至冰橋融化後再行撤回辦理甚屬周密著該督等嚴飭該鎮認真會哨隨時稽

查兵任該千百戶等稍有疎懈以杜奸萌而靖偷渡不可有名無實日久視爲具文也

道光五年正月十八日

奏爲沿邊會哨事宜請專責成以臻周密恭摺具奏  
事竊臣前歲籌辦番案因沿邊一帶地方山多路  
襍易於藏奸當經

奏准除各要隘安兵設卡防範外每年再令提鎮大  
員各帶弁兵按季前往會哨一次每季令副叅遊  
都各員各帶弁兵前往會哨一次遇有漢奸混跡  
偷挖金砂等事立即查拏究辦以絕奸萌並恐會

哨各員未能周歷遊巡致有疎漏復經臣議定章

程每逢會哨之際將應派將備先期報明甘肅提

督及臣衙門卽由該提督指派地方由何口進山

由何路行走至何處會哨再由何口出山巡察回

營臣隨時派人稽查務期實力奉行處處悉臻嚴

密迺近來風聞會哨各員因見邊地肅清往往憚

於跋涉卽由平坦大道循例一行未能認真周至

現經臣疊次密查雖尙不敢任意懈怠但恐日久

興生難保不相率偷安漸致有名無實若不設法

查核無以永久遵行惟是臣駐劄省垣相距邊地



竊違卽隨時加意訪查終慮未能密匝查甘肅提督駐劄甘州附近口外地方耳目易於周到臣再四籌畫應請嗣後每年每季會哨事宜於派定地方後卽責成甘州提督實力稽考如有任意自由怠玩從事者卽由該提督揭報臣衙門隨時指名叅辦不稍寬貸臣一而仍不時派人前往密查倘有前項情弊提督不行揭報卽將該提督一併奏叅以示懲儆統俟一年會哨完竣再將有無潛匿漢奸偷挖金沙之處於次年春間令該提督自行彙奏一次如此嚴定章程庶幾考察周詳於邊防

會哨事宜益資得力謹

奏

道光五年二月初五日奉

上諭那彥成奏會哨事宜請專責成一摺甘肅沿邊一帶山多路襍每年每季令提鎮大員等前往會哨自應實力巡查據該督奏稱近來會哨各員往往憚於跋涉卽由平坦大道前行誠恐日久偷安漸至有名無實著照所請嗣後每年每季會哨時於派定地方後卽責成甘州提督就近實力稽考如有任意怠玩者由該提督揭報著該督隨時指名叅辦仍令不時

派人密查倘有前項情弊提督不行揭報卽一併嚴  
系統俟一年會哨完竣再將有無潛匿漢奸偷挖金  
砂之處於次年春間令該提督自行彙奏以重邊防  
道光五年五月二十日會同西寧辦事大臣穆公  
蘭岱

奏爲酌請邊要地方撥添弁兵增設塘汛以資巡防  
恭摺奏

聞事竊前次野番渡回河南設立門牌計口授食禁絕  
內地奸民私販糧茶接濟野番嚴飭沿邊文武員  
弁查拏偷渡賊匪及透漏奸徒務使邊境肅清以

仰副

聖主戢暴安邊之至意惟查西寧鎮屬之康家寨堡孤  
懸河南近界邊外西至貴德一百八十餘里東至  
巴燕戎格屬之甘都堂汛一百三十餘里其間黃  
河南北兩岸漢回番民環繞襍居山後卽係野番  
插帳之處熟番生番勾結往來徑僻路多綿長鴛  
湖奸匪出沒靡常巡緝尤爲緊要卽如上年兩次  
連劫分水嶺駛運官工木植牲畜一案俱係該處  
番回此擎彼竄歷數月之久始得全行就獲該處  
向設千總一員馬步守兵六十三名除分撥屯防

守卡分巡外該營堡僅存兵二十餘名實不足以資緝防臣等公同酌議請在於西寧鎮屬標路各營抽撥經制外委一員馬步守兵五十名連原額設額外外委馬步守兵共有一百一十五員名如此撥添實於巡防緝捕有益且可控制扼要又查巴燕戎格廳屬之日蘭木地方爲河北渡口之要津其南岸係野番思昂拉族插帳之所又不可不加以防範應請在於該處添設塘汛一處就近派撥巴燕戎格營外委一員兵十名更換臣等查照周密所撥官兵馬匹軍械糧餉均有原臣原額之

項毋庸另議惟康家寨兵房雖舊有空房足敷棲止但倒塌損壞必須粘補修葺酌議撥去之兵每名給銀三兩令其自行修理居住共需銀一百五十兩日蘭木建立塘汛一處約需銀一百兩二處共需銀二百五十兩爲數無多臣等自行籌款辦理毋庸另請

帑項如蒙

允准所有應撥弁兵營分數目照例冊報兵部工部查考至新設塘汛嗣後歲修應統歸地方官辦理開銷以昭畫一謹

奏

道光五年六月初五日奉

上諭那彥成等奏邊要地方請撥添弁兵增設塘汛一摺甘肅西寧鎮屬之康家寨堡爲漢回番民襍處之區且山後插帳野番往往勾結熟番乘間出沒地方最爲緊要據該督等查明該處舊設弁兵除分屯防守卡分巡外該營堡存兵無多不足以資防堵著照所請准其在該鎮屬標路各營抽撥經制外委一員馬步守兵五十名連原設額外外委馬步守兵共有一百一十五員名於控制緝防兩有裨益其巴燕

戎格廳屬之曰蘭木地方爲河北渡口要津南岸野  
番尤宜加意防範並著准其於該處添設塘汛一處  
就近派撥巴燕戎格營外委一員兵十名隨時更換  
稽查務須周密毋得日久生懈餘著照所請辦理該  
部知道

那文毅公三任陝甘總督奏議卷五十七